



c40-4514

了翁上座請大藏及有
家書置之武州紫雲山
戒微笑塔院庭中永
為學者不厭許出院內
當山二世鐵牛機譯誌



64853

大方廣佛華嚴經卷第十六

唐罽賓國三藏般若奉詔譯

入不思議解脫境界普賢行願品之十六

爾時善財童子聞伐蘇蜜多離貪欲際解脫門一心隨順憶念修行觀彼菩薩無礙音聲藏三昧行彼菩薩徧歡喜三昧尋彼菩薩無礙音聲藏三昧思彼菩薩徧往一切佛刹三昧念彼菩薩離一切世間光明三昧入彼菩薩寂靜莊嚴三昧修彼菩薩摧伏外道三昧觀彼菩薩佛境界光明三昧思彼菩薩攝一切衆生不捨三昧住彼菩薩增長衆生福德藏三昧念一切

智漸次前行至彼岸城詣居士宅頂禮其足合掌而立白言聖者我已先發阿耨多羅三藐三菩提心而未知菩薩云何學菩薩行云何修菩薩道我聞聖者善能誘誨願爲我說居士告言善男子我得菩薩解脫名不般涅槃際善男子我不生心言如是如來已般涅槃如是如來現般涅槃如是如來當般涅槃我知十方一切世界諸佛如來畢竟無有般涅槃者唯除爲欲調伏衆生而示現耳善男子我開彼栴檀座如來塔門時得三昧名佛種無盡善男子我念念中入此三昧念念得知一切諸佛殊勝之事善財白言

此三昧者境界云何居士答言善男子我入此三昧時隨其次第見此世界一切諸佛相續出現所謂迦葉佛拘那含牟尼佛拘留孫佛毗舍浮佛尸棄佛毗婆尸佛提舍佛弗沙佛名稱佛最勝蓮華佛如是等佛而爲上首於一念頃得見百佛得見千佛得見百千佛得見億佛百億佛千億佛百千億佛阿庾多億佛那由他億佛乃至見不可說不可說世界極微塵數佛如是一次第皆見亦見彼佛初始發心種諸善根獲勝神通成就大願修行妙行具波羅蜜入菩薩地得清淨忍摧伏魔軍成等正覺國土清淨衆會

莊嚴放大光明神通自在作師子吼轉妙法輪變化示現種種差別無量方便成熟衆生善巧宣揚無分別法我悉能持我悉能憶悉能觀察分別顯示隨順解了無有忘失如是未來彌勒佛等百佛千佛百千佛乃至不可說不可說世界極微塵數佛及初發心相續不斷信解甚深勤求不懈精進勢力速疾增長一切世間凡夫二乘所不能動亦見現在毗盧遮那佛等十方不可說不可說佛刹極微塵數一切世界諸佛如來悉亦如是彼一切佛我皆現見彼一切法我悉得聞憶念受持心無忘失以智慧力隨順解了

以慈悲力宣揚顯示善男子我唯知此菩薩所得不般涅槃際解脫門如諸菩薩摩訶薩以一念智普知三世一念遍入一切三昧如來智日恒照其心於一切法無有分別了一切佛悉皆平等如來及我一切衆生等無有二知一切法自性清淨光明普照無所不徧無有思慮無有動轉而能普入一切世間離諸分別住佛法印悉能開悟法界衆生而我云何能知能說彼功德行善男子於此南方有山名補怛洛迦彼有菩薩名觀自在汝詣彼問菩薩云何學菩薩行修菩薩道爾時居士因此指示卽說偈言

海上有山衆寶成 賢聖所居極清淨

泉流縈帶爲嚴飾 菩林果樹滿其中

最勝勇猛利衆生 觀自在尊於此住

汝應往問佛功德 彼當爲汝廣宣說

時善財童子禮居士足繞無數帀殷勤瞻仰辭退而去爾時善財童子蒙居士教隨順思惟一心正念入彼菩薩深信解藏得彼菩薩能隨念力憶彼諸佛出現次第見彼諸佛成等正覺持彼諸佛所有名號觀彼諸佛所證法門知彼諸佛具足莊嚴信彼諸佛所轉法輪思彼諸佛智光耀念彼諸佛平等三昧解

彼諸佛自性清淨修彼諸佛無分別法契彼諸佛甚深法印作彼諸佛不思議業漸次前行至於彼山處求覓此大菩薩見其西面巖谷之中泉流縈映樹林蓊鬱香草柔軟右旋布地種種名華周徧嚴飾觀自在菩薩於清淨金剛寶葉石上結跏趺坐無量菩薩皆坐寶石恭敬圍繞而爲宣說智慧光明大慈悲法令其攝受一切衆生善財見已歡喜踊躍於善知識愛樂尊重合掌恭敬目視不瞬作如是念善知識者卽是如來善知識者一切法雲善知識者諸功德藏善知識者難可值遇善知識者十力寶因善知識

者無盡智炬善知識者福德根芽善知識者一切智門善知識者智海導師善知識者集一切智助道之具作是念已卽便往詣大菩薩所爾時觀自在菩薩遙見善財告言善哉善來童子汝發大乘意普攝衆生起正真心專求佛法大悲深重救護一切住不思議最勝之行普能拯拔生死輪迴超過世間無有等比普賢妙行相續現前大願深心圓滿清淨勤求佛法悉能領受積集善根恒無厭足順善知識不違其教從文殊師利功德智慧大海所生其心成熟得佛威力已獲廣大三昧光明專意希求甚深妙法常見諸佛生大歡喜智慧清淨猶如虛空旣自明了復爲他說安住如來智慧光明受持修行一切佛法福智寶藏自然而至一切智道速得現前普觀衆生心無懈倦大悲堅固猶若金剛爾時善財童子詣菩薩所禮菩薩足繞無數帀合掌而住白言聖者我已先發阿耨多羅三藐三菩提心而未知菩薩云何學菩薩行云何修菩薩道我聞聖者善能教誨願爲我說爾時觀自在菩薩摩訶薩放闇浮檀金妙色光明起無量色寶焰網雲及龍自在妙莊嚴雲以照善財卽舒右手摩善財頂告善財言善哉善哉善男子汝已能

發阿耨多羅三藐三菩提心善男子我已成就菩薩
大悲速疾行解脫門善男子我以此菩薩大悲行門
平等教化一切衆生攝受調伏相續不斷善男子我
恒住此大悲行門常在一切諸如來所普現一切諸
衆生前隨所應化而爲利益或以布施攝取衆生或
以愛語攝取衆生或以利行攝取衆生或以同事攝
取衆生或現種種微妙色身攝取衆生或現種種不
思議色淨光明網攝取衆生或以音聲善巧言辭或
以威儀勝妙方便或爲說法或現神變令其開悟而
得成熟或爲化現種種色相種種族姓種種生處同
類之形與其共居而成熟之善男子我修習此大悲
行門願常救護一切衆生令離諸怖所謂願一切衆
生離險道怖離熱惱怖離猛獸怖離繫縛怖離殺害
怖離王官怖離貧窮怖離不活怖離惡名怖離於死
怖離諸病怖離懈怠怖離黑暗怖離遷移怖離愛別
怖離怨會怖離逼迫身怖離逼迫心怖離憂悲愁歎
作是願願諸衆生若念於我若稱我名若見我身皆
得免離一切恐怖滅除障難正念現前善男子我以
如是種種方便令諸衆生離諸怖畏住於正念復教

令發阿耨多羅三藐三菩提心至不退轉爾時觀自在菩薩摩訶薩欲重明此解脫門義爲善財童子而說偈言

善來調伏身心者

稽首讚我而右旋

我常居此寶山中

住大慈悲恒自在

我此所住金剛窟

莊嚴妙色衆摩尼

常以勇猛自在心

坐此寶石蓮華座

天龍及以修羅衆

緊那羅王羅刹等

如是眷屬恒圍遶

我爲演說大悲門

汝能發起無等心

爲見我故而來此

愛樂至求功德海

禮我雙足功德身

欲於我法學修行

願得普賢真妙行

我是勇猛觀自在

起深清淨大慈悲

普放雲網妙光明

廣博如空極清淨

我垂無垢臍圓臂

百福妙相具莊嚴

摩汝深信善財頂

爲汝演說菩提法

佛子應知我所得

一相一味解脫門

名爲諸佛大悲雲

秘密智慧莊嚴藏

我爲精勤常救護

起諸弘誓攝衆生

憐愍一切如己身

常以普門隨順轉

我於無數衆苦厄 常能救護諸羣生
心念禮敬若稱名 一切應時皆解脫
或遭牢獄所禁繫 桀械囚執遇怨家
若能至心稱我名 一切諸苦皆銷滅
或犯刑名將就戮 利劍毒箭害其身
稱名應念得加持 弓矢鋒刃無傷害
或有兩競詣王宮 訴訟一切諸財寶
彼能至誠稱念我 獲於勝理具名聞
或於內外諸親屬 及諸朋友共爲怨
若能至誠稱我名 一切怨家不能害

或在深林險難處 怨賊猛獸欲傷殘
若能至心稱我名 惡心自息無能害
或有怨家懷忿毒 推落險峻大高山
若能至心稱我名 安處虛空無損壞
或有怨家懷忿毒 推落深流及火坑
若能至心稱我名 一切水火無能害
若有衆生遭厄難 種種苦具逼其身
若能至心稱我名 一切解脫無憂怖
或爲他人所欺謗 常思過失以相讎
若能至心稱我名 如是怨嫌自休息

或遭鬼魅諸毒害 身心狂亂無所知
若能至心稱我名 彼皆消滅無諸患
或被毒龍諸鬼衆 一切怨怖奪其心
若能至誠稱我名 乃至夢中皆不見
若有諸根所殘缺 願得端嚴相好身
若能至誠稱我名 一切所願皆圓滿
若有願於父母所 承順顏色志無違
歡榮富樂保安寧 珍寶伏藏恒無盡
內外宗族常和合 一切怨隙不來侵
若能至誠稱我名 一切所願皆圓滿
若人願此命終後 不受三塗八難身
恒處人天善趣中 常行清淨菩提道
有願捨身生淨土 普現一切諸佛前
普於十方佛刹中 常爲清淨勝薩埵
普見十方一切佛 及聞諸佛說法音
若能至誠稱我名 一切所願皆圓滿
或在危厄多憂怖 日夜六時稱我名
我時現住彼人前 爲作最勝歸依處
彼當生我淨佛刹 與我同修菩薩行
由我大悲觀自在 令其一切皆成就

或清淨心興供養 或獻寶蓋或燒香
或以妙筆散我身 當生我刹爲應供
或生濁劫無慈愍 貪嗔惡業之所纏
種種衆苦極堅牢 百千繫縛恒無斷
彼爲一切所逼迫 讚歎稱揚念我名
由我大悲觀自在 令諸惑業皆銷滅
或有衆生臨命終 死相現前諸惡色
見彼種種色相已 令心惶怖無所依
若能至誠稱我名 彼諸惡相皆銷滅
由我大悲觀自在 令生天人善道中

此皆我昔所修行 願度無量羣生衆
勇猛精勤無退轉 令其所作皆成就
若有如應觀我身 令其應念咸皆見
或有樂聞我說法 令聞妙法量無邊
一切世界諸羣生 心行差別無央數
我以種種方便力 令其聞見皆調伏
我得大悲解脫門 諸佛證我已修學
其餘無量功德海 非我智慧所能知
善財汝於十方界 普事一切善知識
專意修行無懈心 聽受佛法無厭足

若能聞法無厭足 則能普見一切佛

云何見佛志無厭 由聽妙法無厭足

爾時觀自在菩薩說此偈已告善財言善男子我唯得此菩薩大悲速疾行解脫門如諸菩薩摩訶薩已淨普賢一切願已住普賢一切行常行一切諸善法常入一切諸三昧常住一切無邊劫常詣一切無邊刹常觀一切諸如來常聞一切三世法常息一切衆生惡常長一切衆生善常絕衆生生死流常入如來正法流而我云何能知能說彼功德行爾時善財童子聞觀自在菩薩摩訶薩說此大悲清淨偈已歡喜踊躍充徧其身生愛敬心增信樂心發清淨心從坐而起偏袒右肩右膝著地禮菩薩足長跪合掌於菩薩前瞻仰一心以偈讚曰

天人大衆阿脩羅 及與一切諸菩薩

以妙言音共稱讚

能於一切衆生中

平等大悲同一味

一智同緣普救護

種種苦難皆銷滅

菩薩最勝神通力

反覆大地不爲難

又能乾竭於大海

令大山王咸震動

聖者菩薩大名聞

號曰大悲觀自在

云何我以微劣智
於仁勝德能稱讚
我聞聖者諸功德
無斷無盡大悲門
因是發起清淨心
生我智慧辯才力
我今處於大衆會
以大勇猛而觀察
稱揚讚歎妙莊嚴
恭敬至誠無懈倦
如大梵王居梵衆
映蔽一切諸梵天
菩薩吉祥妙色身
處於衆會無倫匹
菩薩顧視同牛王
妙色融朗如金聚
具足廣大菩提願
普利一切諸天人
種種華鬘以嚴飾
頂上真金妙寶冠

光明淨妙過諸天
威德尊嚴超世主
圓光狀彼流虹繞
外相明如淨月輪
頂相豐起若須彌
端嚴正坐如初日
腰繫金條色微妙
現殊勝相放光明
伊尼鹿皮作下裙
能令見者生歡喜
妙身種種莊嚴相
衆寶所集如山王
腰垂上妙清淨衣
如雲普現無邊色
真珠三道爲交絡
猶如世主妙嚴身
恒放淨光普照明
亦如朗日遊空界
身色淨妙若金山
又如瞻博迦華聚

以白瓔珞爲嚴飾 如白龍王環繞身
世主手執妙蓮華 色如上妙真金聚
毗瑠璃寶以爲莖 大慈威力令開發
出過天人之所有 普放光明猶日輪
顯現如在妙高山 香氣普熏於一切
於諸惡鬼部多等 黑蛇醉象及師子
癡火毒害殺慈心 及餘種種諸危難
重苦繫縛所傷迫 一切恐怖無依怙
世主一味大悲心 平等救彼衆生類
妙寶葉石爲勝座 無等蓮華之所持
百千妙福之所成 衆妙蓮華所圍遶
極妙身光清淨色 從真勝義而成就
諸天種種上妙供 咸共讚歎仁功德
於尊能發清淨意 速離一切憂怖心
眷屬快樂共歡娛 一切妙果皆圓滿
大海龍王住自宮 及餘居處諸龍衆
常懼妙翅大鳥王 摶撮傷殘受諸苦
或有衆生入大海 遇風鼓浪如雪山
若遭摩竭欲來吞 恐怖驚惶無所救
或遇醉象而奔逐 種種厄難之所纏

至心憶念大悲尊

如是一切無憂怖

大石山王有洞窟

其窟幽深極可畏

有犯王法鎖其身

種種繫縛投於彼

彼諸苦惱衆生等

至心憶念大悲尊

枷鎖解脫苦銷除

一切無憂安隱樂

仁以大悲清淨手

攝取憶念諸衆生

令於一切厄難中

獲得無憂安隱樂

我今讚歎人天主

最勝威德大仙王

三毒翳障盡銷除

福智無涯如大海

調伏衆生無懈倦

利樂平等無怨親

願於菩薩妙金山

一切勝福皆成就

普於十方諸世界

息滅衆生邪見心

速獲如來無上身

普願衆生成證得

爾時有一菩薩名正性無異行從於東方上虛空中來至此世界輪圍山頂以足按地時此世界六種震動變成無數雜寶莊嚴復於其身放大光明暎蔽一切釋梵護世天龍八部日月星電所有光明皆如聚墨其光普照地獄餓鬼畜生閻羅王界及餘一切苦惱衆生罪垢銷除身心清淨又於一切諸佛刹土普興一切諸供養雲普雨一切香華瓔珞衣服幢蓋如

是所有諸莊嚴具供養於佛復以神力隨諸衆生心之所樂普於一切諸宮殿中而現其身令其見者皆悉歡喜然後來詣觀自在菩薩摩訶薩所時觀自在菩薩告善財言善男子汝見正性無異行菩薩來此大會道場中不善財答言唯然已見告言善男子汝可往問菩薩云何學菩薩行修菩薩道爾時善財童子於觀自在菩薩所得甚深智入大悲門以甚深心隨順觀察心無疲厭一心頂禮觀自在菩薩足繞無數帀敬承其教辭退而行往詣正性無異行菩薩所頂禮其足合掌而立白言聖者我已先發阿耨多羅三藐三菩提心而未知菩薩云何學菩薩行云何修菩薩道我聞聖者善能誘誨願爲我說菩薩告言善男子我得菩薩解脫名普門不動速疾行善財言聖者於何佛所得此解脫所從來剎去此幾何發來久如菩薩告言善男子如此境界甚深難解一切世間天人阿脩羅沙門婆羅門等所不能了唯諸菩薩最勝精進具菩薩行無退無怯已能親近諸善知識善友所攝諸佛所念增長善根志樂清淨得菩薩根有智慧眼能聞能持能解能入善財白言唯願聖者爲我宣說我當承佛威神之力善知識力能信能受能

解能入菩薩告言善男子我從東方具足吉祥藏世界普吉祥出生佛所而來此土善男子於彼佛所得此法門從彼發來已經不可說不可說不可說佛刹極微塵數步數劫一一念中舉不可說不可說佛刹極微塵數步一一步過不可說不可說佛刹極微塵數世界一步世界我皆偏入以最勝心至其佛所以妙供具而爲供養及施一切諸衆生海此諸供具皆是無上心所成無作法所印諸如來所忍諸菩薩所歎善男子我又普見彼世界中一切衆生悉知其心悉知其根隨其解欲現身說法或放光明或施財寶種種方便教化調伏利樂成熟無有休息如從東方南西北方四維上下亦復如是善男子我唯得此菩薩普門不動速疾行解脫能疾周徧到一切處如諸菩薩摩訶薩隨順徧行普於十方無所不至智慧境界等無差別善布其身悉徧法界至一切道入一切刹知一切法觀一切世平等演說一切法門深信愛樂一切妙行同時照耀一切衆生於諸佛所不生分別於一切處無有障礙而我云何能知能說彼功德行善男子南方有城名爲門主其中有神名曰大天汝詣彼問菩薩云何學菩薩行修菩薩道時善財童子禮菩薩足

繞無數帀殷勤瞻仰辭退而去

大方廣佛華嚴經卷第十六

音釋

肅

丑容切
圓直也

極械

扭轍久切
械下介切

乾竭

乾居寒切
竭巨列切燥也

虹

戶工切
蟠蛻也

條

土刀切
絲繩也

搏撮

搏伯各切
擊也撮括切

誥封淑人吳江金氏施貴刻此

華嚴經

普賢行願品第十六卷

祈求修行得道早證

菩提延年益壽者

汝寧比丘如清對

士登書上元許可久刻

願寧唐

萬曆辛卯夏清涼山妙德庵識

大方廣佛華嚴經卷第十七

唐罽賓國三藏般若奉詔譯

入不思議解脫境界普賢行願品之十七
爾時善財童子入菩薩廣大行正念思惟心無障礙
求菩薩智慧境見菩薩神通事念菩薩勝功德被菩
薩堅進甲生菩薩大歡喜趣菩薩不思議遊菩薩大
自在修菩薩功德地觀菩薩三昧地住菩薩總持地
具菩薩大願地得菩薩辯才地成菩薩諸力地漸次
前行至於彼城尋訪大天今在何所人咸告言在此
城內現廣大身處高顯座爲衆說法善財聞已往至

其所頂禮其足合掌而立白言聖者我已先發阿耨
多羅三藐三菩提心而未知菩薩云何學菩薩行云
何修菩薩道我聞聖者善能教誨願爲我說爾時大
天卽於是時長舒四臂取四海水自洗其面持諸金
華以散善財而告之言善男子甚奇希有乃能如是
求善知識善男子一切菩薩出現世間最極希有難
可得聞難可得見如衆生中芬陁利華於險難處爲
歸爲救如安隱城於黑闇處作大光明猶如朗日又
如導師引諸衆生入佛法門亦如猛將善能守護一
切智城善男子菩薩如是難可遇會唯身語意具足
清淨無諸過失然後乃得見其形相聞其辯才於一
切時常現在前善男子我已成就菩薩解脫名爲雲
網善財白言聖者雲網解脫境界云何爾時大天於
善財前示現種種金聚銀聚瑠璃聚玻瓈聚硯磲聚
碼碯聚摩尼寶聚無垢藏寶聚毗盧遮那寶聚普現
十方寶聚寶冠聚寶印聚寶鬘聚寶璫聚寶釧聚寶
鎖聚寶鈴聚寶瓔珞聚寶珠網聚種種衆色摩尼寶
聚種種一切寶莊嚴聚種種如意摩尼寶聚一一種
聚皆如大山又復示現一切華一切香一切鬘一切
蓋一切幢一切旛一切塗香一切末香一切衣服一

切音樂一切五欲娛樂之具亦如山積及現無數百
千萬億諸童女衆而彼大天告善財言善男子今恣
汝意可取此物供養如來修諸福德并施一切攝取
衆生顯示難捨而能捨故令其修學檀波羅密善男
子如我爲汝示現此物教汝行施乃至普爲一切衆
生悉亦如是皆令以此布施善根熏習力故令其息
滅不欲行施障勝行心於佛法僧最勝福田善知識
所恭敬供養種諸善根增長善法發阿耨多羅三藐
三菩提心復次善男子若有衆生貪著五欲自放逸
者爲其示現不淨境界何以故由彼衆生愚癡迷惑
被諸女色昏醉其心猶如嬰孩無有自性亦如素衣
易受染色爲欲所溺不能得出如糞中蟲樂著糞處
如穢弊猪不淨嚴身如犯罪人種種繫縛如世劫賊
恒奪法財如犯極刑將付魁膾如瞽導盲俱墮坑險
如船泛海遭遇惡風損害善根喪諸法寶如近惡龍
爲欲所盲爲欲所繫爲欲所使爲欲所迷恒順欲心
而爲僮僕常隨欲轉如犢逐母爲欲所縛不得自在
善男子我爲此等盲瞑衆生生憐愍心方便濟拔先
現端正可愛女身稱悅其心令其耽著復現命終其

身壞爛爲諸鳥獸之所噉食種種不淨如屍陁林復現恐怖羅刹女形身狀黑雲鬢髮丹赤大腹下垂鉤牙上出以人髑髏而爲嚴飾手執利劍發大惡聲現如是身向染欲者令起驚歎心生惶怖因斯發起求見我心我應彼形爲其說法令除歎怖安住戒身成就最勝戒波羅蜜具足十種波羅蜜門乃至圓滿菩提勝果爾時大天卽爲善財種種稱讚戒波羅蜜而說偈言

如諸衆生及草木

一切生長咸依地

世及出世諸善根

皆依最勝尸羅地

無戒欲求生善道

如鳥無翼欲飛空

如人無足欲遊行

亦如渡海無船筏

如諸苦行食根果

飲水自活住山林

或衣樹皮如獸居

無戒不得爲清淨

有剃四周留頂髮

或不沐髮縈爲髻

或有裸形或異服

此等無戒皆如戲

或於冰河而洗浴

或投盛火以焚身

或升高山自墜形

此等無戒徒爲死

或浴華池辯才水

或恒飲浴死陀伽河

晝夜求福以爲依

此等無戒空無果

或於日夕三時浴 或復三時作護摩
却粒自默如啞羊 無戒苦身無所利
欲往天宮盡天壽 服天瓔珞以嚴身
飲食天中諸上味 飲食天中諸上味
或大族子旃陁子 貴賤種姓戲戒身
貴賤種姓戲戒身 俱能持戒等生天
卑門持戒生天上 皆墮地獄無差別
摩登持戒亦生天 勝族毀犯墮幽冥
王族多聞具色力 仙人破戒入諸獄
如甘果樹猛獸圍 惡見無戒如獸蛇
寧守貧賤恒持戒 猶蓮華池毒蛇止
破戒衆人之所輕 具聖財寶德嚴身
梅檀鬱金及沉麝 持戒天人咸信重
菩薩持戒最勝香 如是一切不爲香
此世他生安隱樂 徒出人天無有盡
卑陋持戒後生天 現蒙王者所瞻禮
欲生人天及涅槃 如是戒果牟尼說
是故精勤持淨戒 如應具戒必當得
若有臨終肢節痛 隨心所願皆圓滿
諦思我有清淨戒 一切親屬欲分離

戒爲惑病最勝藥

護諸苦厄如父母

癡闇燈炬生死橋

無涯業海爲船筏

帝釋轉輪威德王

富貴尊嚴無等倫

家有僕隸能持戒

承事供養而親敬

若有臨至命終時

持戒破戒生安畏

欲得當來極樂處

應當專意勤護持

戒珠不假刀兵護

戒爲伏藏無所侵

戒爲勇伴導前行

戒爲出世莊嚴具

我讚持戒諸功德

如佛世尊真實說

爲覺悟彼破戒者

令心堅住持淨戒

善男子如我以此種種方便教化衆生令住淨戒波
羅蜜中若有衆生瞋恚慢多諍競者我以強力折
伏其心爲其示現極可怖形如羅刹等飲血噉肉令
其見已心生惶懼知有憂苦狀離惱墮而自勉策日
夜精勤以如是等種種方便令捨一切諸不善法修
習一切清淨善法令除一切波羅蜜障令開一切波
羅蜜門令超一切障礙險道令到一切無障礙處善
男子我唯得此菩薩雲網解脫如諸菩薩摩訶薩猶

如帝釋已能摧滅一切煩惱阿修羅軍如大海水普能銷滅一切衆生諸煩惱火如劫盡火普能乾竭一切衆生諸愛欲水如大猛風普能吹碎一切衆生諸見取幢猶如金剛悉能摧破一切衆生諸我見山而我云何能知能說彼功德行善男子此閻浮提摩竭提國菩提場中有主地神名自性不動汝詣彼問菩薩云何學菩薩行修菩薩道時善財童子禮大天足繞無數帀一心瞻戀辭退而行爾時善財童子受天神教漸次前行往東北方趣摩竭國菩提樹王大道場處將詣自性不動神所十千地神同在其中更相謂言此來童子卽是一切如來寶藏必當普爲一切衆生作所依怙必當普壞一切衆生無明穀藏此人已生法王種中當以法繒而冠其首當開智慧大珍寶藏當執菩薩金剛慧劍勇猛自在得法無畏摧伏一切異道邪論當以法船於生死海運濟衆生令達彼岸智解圓滿猶如白月必當息滅一切衆生熱惱亂心爾時自性不動神等一萬地神卽以神力震動大地出雷吼聲放大光明徧照三千大千世界種種寶物處處莊嚴影潔光流遞相鑒徹一切葉樹俱時生長一切華樹咸共開敷一切果樹靡不成熟一切

河流互相灌注一切池沼悉皆盈滿興大密雲雨細
香雨徧灑其地香風時來吹衆名華普散其上無數
音樂一時俱奏出可愛聲天莊嚴具威出美音令人
歡悅天阿修羅乃至非人牛王象王師子王等皆大
歡喜踊躍嗟吼猶如大山相擊出聲百千伏藏自然
涌現時彼地神告善財言善來童子汝於此處曾種
善根我爲汝現汝欲見不爾時善財禮地神足繞無
數帀合掌而立白言聖者唯然欲見時彼地神以足
按地百千億阿僧祇摩尼寶藏自然涌出開發顯現
地神告言善男子今此寶藏隨逐汝行是汝往昔善

根果報是汝福力之所守護汝應恣意自在而用善
男子我得菩薩解脫名難摧伏智慧藏常以此法具
足圓滿成熟衆生善男子我憶自從然燈佛來常隨
菩薩恭敬守護如影隨形從始至今念念無間觀察
菩薩所有心行普偏尋求深入菩薩一切誓願智慧
境界圓滿菩薩一切所修諸清淨行思惟菩薩一切
三昧隨順明達安住菩薩一切法門究竟了知一切
心性圓滿一切大自在力增長一切無能壞法徧往
一切諸佛刹土普受一切諸如來記憶持現覺一切
智性轉於一切諸佛法輪廣說一切修多羅門大法

光明普皆照耀教化調伏一切衆生示現一切諸佛
神變隨順解知受持憶念常無忘失善男子乃往古
世過須彌山極微塵數劫有劫名莊嚴世界名月幢
佛號妙眼於彼佛所最初獲得此解脫門善男子我
從是來於此法門若入若出修習增長常見諸佛未
曾捨離始從初得乃至賢劫於其中間值遇不可說
不可說佛刹極微塵數如來應正等覺悉皆承事恭
敬供養亦見彼佛詣菩提樹坐道場時現大神通種
種佛事亦見彼佛所有一切功德善根善男子我唯
知此難摧伏智慧藏解脫門如諸菩薩摩訶薩常能
隨侍一切諸佛能持一切佛所說法入一切佛甚深
智慧念念充徧一切法界等如來身生諸佛心具諸
佛法作諸佛事心心出生一切諸佛清淨法藏離分
別心常無間斷而我云何能知能說彼功德行善男子
此閻浮提摩竭提國恒河北岸有一大城名迦毗
羅有主夜神名曰春和汝詣彼問菩薩云何學菩薩
行修菩薩道時善財童子禮地神足繞無數帀殷勤
瞻仰一心戀慕辭退而去爾時善財童子蒙地神教
一心思惟憶持菩薩難摧伏智慧藏解脫門修其三
昧學其軌則觀其遊戲入其智海悟其甚深行其勝

行住其大願得其智慧達其平等如是思惟漸次前行北度恒河向迦毗羅城至城南門敬心右繞從東門入佇立未久遇日沒時心念隨順諸菩薩行渴仰欲見春和夜神於善知識生如來想復作是念由善知識得周徧眼普能明見十方境界由善知識得廣大解普能了達一切所緣由善知識得三昧眼普能觀察一切法門由善知識得智慧眼普能明照十方刹海作是念時見彼夜神於虛空中處衆色寶摩尼樓閣香蓮華藏寶師子座身真金色頂髮紺青眼如廣大青蓮華葉形貌端嚴見者歡喜衆寶纓絡以爲嚴飾身服朱衣首戴梵冠一切星宿炳然在體於其身上一一毛孔皆現化度無量無數世界衆生臨欲顛墮墮惡道者悉令免離而得解脫是諸衆生或生人中或生天人或有趣向三乘菩提或有修行一切智道如是影像炳然顯現又彼一一諸毛孔中示現種種教化方便成熟衆生或爲現身種種形色或爲說法種種言音或爲示現聲聞乘道或爲示現獨覺乘道或爲示現諸菩薩行菩薩勇猛菩薩三昧菩薩自在菩薩住處菩薩觀察菩薩思惟菩薩神通菩薩境界菩薩師子顰伸菩薩解脫遊戲如是種種成熟

衆生善財童子見聞此已心大歡喜踊躍欣慶心願圓滿愛敬尊重以身投地禮夜神足繞無數帀於前合掌而作是言聖者我已先發阿耨多羅三藐三菩提心我冀望依善知識威神力故獲諸如來功德法藏唯願聖者與我決定作依止處示我趣向一切智道令我於中修行增進至十力地時彼夜神告善財言善哉善哉善男子汝能深心敬善知識法力聖力入汝身中令汝勤求不惜身命一心親近樂聞其語隨順聽聞修行其教以汝親近聞教修行決定心故當得阿耨多羅三藐三菩提善男子我得菩薩教化調伏破一切衆生癡闇法光明解脫門善男子我於惡慧衆生起大慈心於不善業衆生起大悲心於作善法衆生起於喜心於善惡二行衆生起不二心於雜染衆生起令生清淨心於邪行衆生起令生正行心於劣解衆生起令興大解心於懶慢衆生起今生精進心於樂生死衆生起令捨輪轉心於住二乘道衆生起令住一切智心善男子我以得此解脫門故常與如是心共相應善男子我於夜暗人靜鬼神盜賊諸惡衆生所遊行時密雲重霧惡風暴雨日月星宿並皆昏蔽不見色時見諸衆生若入於海若行

於陸山林曠野沙磧險難一切危厄諸恐怖處或遭盜賊或乏資糧或迷惑方隅或忘失道路惶惶憂怖不能自出我時卽以種種方便而救濟之爲海難者示作船師魚王馬王龜王象王阿脩羅王及以海神捕魚人像爲彼種種海難衆生而作救護所謂止惡風雨息大波浪於洄渦中及迷方中引其道路示其洲岸令免怖畏悉得安隱復作是念以此善根迴施衆生願令捨離一切諸苦爲在陸地一切衆生於夜闇中遭諸恐怖瓦礫荆棘虎豹豺狼師子惡獸毒蛇險路盜賊鬼神肆暴之處現作日月及諸星宿晨霞夕電種種光明或作屋宅或爲人衆天龍八部菩薩如來種種形相引導覆護令其得免恐怖之厄復作是念以此善根迴施衆生悉令除滅諸煩惱闇一切衆生有惜壽命有愛名聞有貪財寶有重官位有著男女有戀妻妾眷屬稠林種種纏縛未稱所求多生憂怖我皆救濟令其離苦爲行山險而留難者爲作善神現形親近爲作好鳥發音慰悅爲作靈藥舒光照耀示其果樹示其泉井示正直道示平坦地或現龕室或現勝居令其免離一切憂苦爲行曠野險道稠林毒樹藤蘿交蔽隱密闇努囉獸潛伏傷殘震吼

出聲驚駭聞者墮此難中種種憂怖雲霧所暗心識昏迷種種事中而恐怖者現大力身救其危難示其正道令得出離作是念言願一切衆生伐見稠林截愛羅網出生死野滅煩惱暗入一切智無畏大城到平坦處畢竟安樂善男子若有衆生戰諍城邑乃至小獸忿競無時我以方便使其和好各起慈心永息乖諍作是念言願一切衆生離煩惱諍得法和合善男子若有衆生樂著國土捨力求取勝負不安種種諍訟而憂苦者我以方便令捨堅執示現無常令生死離作是念言願一切衆生不著諸蘊住一切佛薩婆若境善男子若有衆生樂著聚落貪愛宅舍常處黑暗甘被繫縛受諸苦者我爲說法令生厭離令法滿足令依法住作是念言願一切衆生悉不貪樂六處聚落速得出離生死境界究竟安住一切智城善男子若有衆生行閭夜中迷惑十方於平坦路生險難想於險難道起平坦想以高爲下以下爲高其心迷惑生大苦惱我以方便舒光照及若欲出者示其門戶若欲行者示其道路欲濟彼岸示其橋梁欲涉河海與其船筏若於熱時示其清冷若於寒際示作溫和暖殿涼宮隨時適意若或遊觀常導其前示其

險易安危之處欲休息者示其城邑近處宮室令其
憩止遠行渴乏示其池沼河水水流泉令其飲沐華林
果樹使得清涼身心安樂若有父母妻子眷屬恩愛
分離令其合會無諸苦惱作是念言如我於此照除
闇夜救衆災厄令諸世事悉得宣敘願我普於一切
衆生生死長夜無明闇處以智慧光普皆照了是諸
衆生無有智眼想心見倒之所覆翳無常常想苦中
樂想無我我想不淨淨想堅固執著我人衆生蘊界
處法迷惑因果不了善惡殺害衆生乃至邪見不孝
父母不敬沙門及婆羅門不知惡人不識善人貪著
惡事安住邪法毀謗如來壞正法輪於諸菩薩皆辱
傷害輕大乘道斷菩提心於有恩人反加殺害於無
恩處常懷怨結毀謗賢聖親近惡伴盜塔寺物作五
逆罪不久當墮三惡道中願我速以大智光明破彼
衆生無明黑闇令其疾發阿耨多羅三藐三菩提心
既發心已示普賢乘開十力道亦示如來法王境界
亦示諸佛一切智城諸佛所行諸佛自在諸佛成就
諸佛總持一切諸佛同共一身一切諸佛平等之處
皆令安住善男子一切衆生或病所纏或老所侵或
苦貧窮或遭禍難或犯王法臨當受刑無所依怙生

大怖畏我皆救濟使得安隱謂以方藥除諸病苦供事老朽安樂終年給足資具令無貧乏無主作主無歸作歸苦難逼迫同事救攝令離憂惱令無怖懼復作是念願我以法普攝衆生令其解脫一切煩惱生老病死憂悲苦患近善知識常行法施勤修善業速得如來清淨法身住於究竟無變易處善男子一切衆生入見稠林住於邪道於諸境界起邪分別常行不善身語意業妄作種種諸邪苦行於非正覺生正覺想於正覺所非正覺想爲諸惡友之所攝持以起惡見將墮惡道我以種種諸方便門而爲救護令住正見當生人天復作是念如我救此將墮惡道諸衆生等願我普救一切衆生悉令解脫一切諸苦住波羅蜜出世聖道於一切智得不退轉具普賢願近佛菩提而不捨離諸菩薩行常勤教化一切衆生爾時春和主夜神欲重宣此解脫義承佛威力普觀十方一切法界爲善財童子而說偈言

我此寂靜解脫海

出生具足智光明

遠離一切愚癡暗

觀衆生根而演說

我於往昔無邊劫

具修廣大清淨慈

如日普照於世間

汝應勇猛勤修習

我此難量大悲海 出生三世諸如來
能救法界苦衆生 汝應勇猛勤修習
能生聖道無爲樂 示生世間安隱樂
令我踊躍心歡喜 汝應入此甚深門
已背有爲如幻法 亦棄聲聞解脫乘
常修佛力具莊嚴 汝應入此難思教
我眼清淨廣無邊 普見十方諸刹土
其中所有一切佛 悉坐菩提樹王下
見佛處於大衆會 相好莊嚴妙色身
於諸毛孔放光明 一一光明恒普照
見諸羣生墮業海 死此生彼各差別
相續輪迴五趣中 常受種種無邊苦
我耳清淨量無邊 一念聽周諸刹海
衆生所有語言法 皆悉憶持無忘失
及聞諸佛轉法輪 其音勝妙無能比
言詞訓釋諸方便 我悉憶持無忘失
我鼻廣博甚清淨 於諸法中無所著
住一切處解脫門 汝應入此無疑惑
我舌光明赤銅相 具足清淨妙辯才
巧宣妙法應羣心 汝應入此無疑惑

我身離相恒清淨

常徧一切諸世間

普隨信樂衆生心

爲現色身令得見

我心離著無諸垢

如響普應諸衆生

隨念悉見諸如來

而於其中不分別

不思諸刹衆生海

所有樂欲及諸根

我於一念悉能知

而於其中不分別

我以廣大妙神通

普震難思諸佛刹

威力光明無不現

調伏一切難調衆

我福廣大甚清淨

無量莊嚴無盡藏

普能供養諸如來

等與一切衆生樂

我智廣博甚清淨

了達無邊諸法海

普斷一切衆生疑

佛子宜應善修學

我知三世諸佛海

及了一切諸法海

亦入彼諸大願門

此無等行應修習

我於三世刹塵中

悉見十方諸刹海

亦見其中所有佛

此是普門無等力

普於十方一切刹

悉見大智盧舍那

一切塵中坐道場

以寂靜音宣妙法

爾時善財童子白春和主夜神言汝發阿耨多羅三

藐三菩提心經幾時耶得此解脫其已久如乃有如

是大威德力能作如是利益衆生夜神告言佛子我
念往古過須彌山極微塵數劫有劫名寂靜光世界
名出生吉祥寶五百億佛於中出現彼世界中有四
天下名寶月燈光有城名蓮華光有轉輪王名妙法
岸具足七寶領四天下以聖王道安樂衆生王有夫
人名法智月伎樂自娛夜久眠寢時彼城東有一大
林名寂靜出生妙德林中有一大菩提樹名一切勝
法摩尼王莊嚴身出生諸佛神力光明爾時有佛名
一切法大吼聲王於此樹下成等正覺放無量色廣
大光明名摩尼王普照一切妙寶世界蓮華城內有
主夜神名淨月光詣王夫人法智月所動身瓔珞環
珮出聲以覺夫人而告之言夫人當知一切法大吼
聲王如來於寂靜出生妙德大林之中而成正覺及
廣稱讚諸佛功德自在神力普賢菩薩所有行願令
王夫人發阿耨多羅三藐三菩提心供養恭敬承事
彼佛及諸菩薩聲聞僧衆善男子時王夫人法智月
者豈異人乎我身是也我於彼佛發菩提心深重愛
敬種善根故於須彌山極微塵數劫不生地獄餓鬼
畜生諸惡趣中亦不生於下賤之家諸根具足無有
衆苦於天人中福德殊勝不生惡世恒不離佛及諸

菩薩大善知識常於其所種植善根經八十億須彌山極微塵數劫常受安樂而未滿足菩薩諸根過此劫已復過萬劫於賢劫前有劫名無憂偏照世界名離垢勝德其世界中淨穢相雜有五百佛於中出現其第一佛名須彌幢大寂靜吉祥眼如來應正等覺我爲名稱長者女字妙慧光明端正殊妙人相具足彼淨月夜神以本願力於離垢勝德世界一四天下衆色幢王城中作主夜神名妙淨眼我於一時在父母邊夜久眠息彼妙淨眼來詣我所震動我宅放大光明出現其身讚佛功德言彼如來坐菩提樹始成正覺勸諭於我及以父母并諸眷屬令速見佛自爲前導引至佛所廣興供養我纔見佛卽得調伏衆生見佛三昧及得普照三世智光明輪三昧獲此三昧故能憶念須彌山極微塵數劫亦見其中一切諸佛菩薩出現於彼如來及菩薩所聽聞妙法以聞法故卽得此教化調伏破一切衆生癡暗法光明解脫門得此解脫故卽見其身徧十佛刹極微塵數世界亦見彼世界所有如來又見自身一一親近亦見彼世界一切衆生解其言音識其根性知其往昔曾爲善友之所攝受隨其所樂而爲現身令生歡喜我時於

彼所得解脫念念增長此心無間又見自身徧往百
佛刹極微塵數世界此心無間又見自身徧往千佛
刹極微塵數世界此心無間又見自身徧往百千佛
刹極微塵數世界如是念念乃至不可說不可說佛
刹極微塵數世界亦見彼世界中一切如來亦見自
身在彼佛所聽聞妙法受持憶念觀察決了亦知彼
佛諸本事海諸大願海彼諸如來嚴淨佛刹我亦嚴
淨亦見彼世界一切衆生心性根器形量差別種類
不同隨其所應而爲現身教化調伏令此解脫念念
增長如是乃至充滿法界善男子我唯知此菩薩教
化調伏破一切衆生癡暗法光明解脫門如諸菩薩
摩訶薩成就普賢無邊行願普入一切諸法界海得
諸菩薩金剛智幢自在三昧遊戲神通心無障礙出
生大願住持佛種於念念中成滿一切大功德海嚴
淨一切廣大世界以自在智教化成熟一切衆生以
智慧日滅除一切世間闇障以勇猛智覺悟一切衆
生惛睡以智慧月決了一切衆生疑惑以清淨意斷
除一切諸有執著於一切法界一一塵中示現一切
自在神力智眼明淨等見三世而我何能知其妙行
說其功德入其境界示其自在遊戲神通善男子此

閣浮提恒河南岸摩竭提國菩提場中有主夜神名
普偏吉祥無垢光我本從其發阿耨多羅三藐三菩
提心常以妙法開悟於我汝詣彼問菩薩云何學菩
薩行修菩薩道爾時善財童子合掌恭敬向春和夜
神以偈讚曰

我今見汝清淨身 色相端嚴如妙德
威光超世無能比 殊特猶若寶山王
見汝清淨妙法身 等於三世無分別
普入一切諸世間 若壞若成無所著
我今普觀一切趣 見汝所現差別身
猶如星月處虛空 一一毛中皆得見
汝心廣大常清淨 如空普遍於十方
一切諸佛悉入中 智慧平等無分別
汝身一一諸毛孔 放刹塵數光明雲
悉偏十方佛刹中 普雨一切莊嚴具
汝身一一諸毛孔 等衆生數而現身
普於十方世界中 方便化度令調伏
汝身一一諸毛孔 示現不可思議刹
普隨一切衆生心 莊嚴顯現令清淨
若有衆生見汝身 聞名愛樂生歡喜

獲功德利清淨命 當必成就大菩提

隨於惡趣無邊劫 恒受種種無量苦

聞名暫發歡喜心 諸煩惱業皆銷滅

於千佛刹微塵劫 讚歎汝身一毛德

微塵劫數猶可窮 汝身功德終無盡

爾時善財童子以此妙偈讚夜神已禮夜神足繞無
數帀殷勤瞻仰辭退而去

大方廣佛華嚴經卷第十七

校譌

第四紙

十二行往南藏作住

第十八紙

二行方此作方藏作大

第十四紙

三行懷北藏作壞

第十四紙

音釋

璫

耳珠也 郎切充釧切

釧

臂環也 繩切

魁

魁頭也 魏切

膾

膾口角切

藏

藏才浪切

嚙吼

嚙虎許交切

龠

下室

曰龕驚也

忽聲也

金匱王門虞氏 王門賀氏共施賚刻此
華嚴經普賢行願品第十七卷各祈身心安樂 得
生淨土 汝寧比丘如清對 願寧唐士登書

溧水陶學周刻

萬曆辛卯夏清涼山妙德庵識

大方廣佛華嚴經卷第十八

唐罽賓國三藏般若奉詔譯

入不思議解脫境界普賢行願品之十八

爾時善財童子一心思惟彼夜神教了知彼神初發菩提心圓滿清淨所生菩薩藏所發菩薩願所淨菩薩波羅蜜所入菩薩諸住地所修菩薩行所行出離道隨順一切智光海發普救一切衆生心起大悲雲普覆一切於諸佛刹盡未來際常能出生普賢行願漸次遊行詣彼夜神頂禮其足繞無數匝於前合掌而作是言聖者我已先發阿耨多羅三藐三菩提心

而未知菩薩云何修行菩薩地云何出生菩薩地云
何成就菩薩地夜神答言善哉善哉善男子汝已能
發阿耨多羅三藐三菩提心復能問於諸菩薩地修
行出生及以成就善男子菩薩具足十法則能圓滿
諸菩薩行何等爲十一者得清淨三昧常見一切如
來現前二者以清淨眼常觀一切如來相好三者以
甚深智知諸如來福智大海四者知等法界無量諸
佛法光明海五者知諸如來一一毛孔放等衆生數
大光明海利益一切六者見諸如來一一毛孔出衆
寶色光明焰海七者念念出現佛變化海普偏法界
調伏衆生八者得佛音聲同諸衆生語言音海能轉
三世諸佛法輪九者知一切佛無邊名號海十者知
一切佛調伏衆生不可思議自在威力善男子菩薩
具足此十種法則能圓滿諸菩薩行善男子我得菩
薩解脫名寂靜禪定樂普遊步勇猛法門普見三世
一切諸佛亦見彼佛清淨國土道場衆會三昧神通
相應行海種種名號說法壽命言音身相種種不同
充滿法界悉皆明見甚深趣入而無取著亦無入處
何以故知諸如來非去世趣永滅故非來體性無生
故非生法身平等故非滅無有生相故非實住如幻

法故非虛利益衆生故非遷超過生死故非壞性常
不變故一相言語悉離故無相性相本空故善男子
我如是知一切如來時於菩薩寂靜禪定樂普遊步
勇猛解脫門分明了達成就增長思惟觀察堅固莊
嚴普偏照明種種境界圓滿廣大甚深隨順住平等
際不起一切妄想分別大悲救護一切衆生一心不
動修習初禪息諸意業攝諸衆生智力勇猛喜心悅
懌修第二禪思惟一切衆生自性厭離生死住涅槃
樂修第三禪悉能息滅一切衆生衆苦熱惱修第四
禪增長圓滿一切智願善巧出生諸三昧海入諸菩
薩解脫海門遊戲一切菩薩神通成就一切清淨變
化以清淨智普入法界善男子我修習此解脫門時
以種種方便成熟衆生所謂於在家放逸貪欲衆生
令生不淨想不愛樂想可厭想疲勞想逼迫想繫縛
想羅刹想無常想苦想空想無我想無主想不自在
想老病死想自於欲境不生愛樂亦勸衆生不著欲
樂唯住法樂出離於家入於非家若有衆生住於空
闊我爲止息諸惡音聲於靜夜時爲說深法與順行
緣開出家門示正道路爲作光明除其暗障滅其怖
畏讚出家業歎佛法僧及善知識具諸功德亦歎親

近承事供養善知識行善男子我修如是解脫門時令諸衆生離非法貪捨邪分別未生惡法令其不生若已作者皆令止息妄想境界所不能轉未生諸善法未修波羅蜜未求一切智未起殊勝願未發大慈悲未造人天業皆令得生若已生者令其增長我與如是順道因緣乃至令成一切智智善男子我唯得此菩薩寂靜禪定樂普遊步勇猛解脫門如諸菩薩摩訶薩具足普賢所有行願了達一切無邊法界常能增長一切善根照見一切如來智力住於一切如來境界恒處生死心無障礙疾能滿足一切智願普能往詣一切刹海悉能觀見一切佛海徧能聽受一切法雲能破一切衆生癡闇能於生死大夜之中出生一切智慧光明而我云何能知能說彼功德行善男子去此不遠菩提樹王道場右面有主夜神名喜目觀察一切衆生汝詣彼問菩薩云何學菩薩行修菩薩道爾時普偏吉祥無垢光主夜神欲重明此解脫門義爲善財童子而說偈曰

一切三世諸如來 皆爲信心而出現
若具清淨廣大眼 則能普見諸佛海
汝觀諸佛無垢身 妙相莊嚴極清淨

悉坐衆會道場中 示現神通無不徧
毗盧遮那善逝尊 道樹降魔成正覺
普隨一切衆生心 轉大法輪充法界
佛證甚深真法性 妙體寂靜無差別
色身清淨具莊嚴 普示衆生無有盡
佛身廣大不可思議 偏周法界常無盡
平等普現於十方 一切刹中無不見
諸佛圓光常徧滿 普照一切微塵刹
互相照現色無邊 一周圓充法界
如來毛孔出光雲 廣大難思無有盡
普照一切衆生心 令其煩惱皆除滅
如來毛孔出化雲 一一神通無有量
調伏一切諸衆生 所有衆苦皆除滅
如來廣大圓滿音 聲光所出言辭海
雨大法雨徧羣生 令其普覺菩提性
佛昔無邊劫海中 爲攝受我修諸行
令我今得見如來 影現十方諸刹海
如來出現諸世間 影等一切衆生數
境界甚深難趣入 彼非我智所能知
具大威德諸菩薩 入於善逝一毛中

彼解脫境叵思議 非我能知諸佛智

於此近處有夜天 名星宿光大喜目

汝應往問所修行 彼當授汝菩提道

時善財童子禮夜天足繞無數帀殷勤瞻仰辭退而去爾時善財童子敬順善知識教奉行善知識語作如是念善知識者難見難遇見善知識令心作意無有散亂見善知識能破煩惱大障礙山見善知識能入大悲救衆生海見善知識得智慧光普照法界見善知識悉能修行一切智道見善知識普能覩見十方佛海見善知識得見諸佛轉正法輪憶持不忘作是念已發意欲詣喜目觀察一切衆生夜神所時喜目神以威神力加被善財童子令知親近善知識能生善根增長成熟所謂令知親近善知識能修助道具令知親近善知識能起勇猛心令知親近善知識能作難壞業令知親近善知識能得堅固力令知親近善知識能入無邊方令知親近善知識能久遠修行令知親近善知識能辦無邊業令知親近善知識能行無量道令知親近善知識能得速疾力普詣諸刹令知親近善知識能不離本處徧至十方時善財童子遽發是念由親近善知識能勇猛勤修一切智

道由親近善知識能速疾出生諸大願海由親近善知識能爲利樂一切衆生盡未來劫受無邊苦由親近善知識能被勇猛精進甲於一極微中說法聲徧法界由親近善知識能速往詣徧十方海由親近善知識於一毛道盡未來劫修菩薩行由親近善知識於念念中行菩薩行究竟安住一切智地由親近善知識能入三世一切如來自在神力諸莊嚴道由親近善知識常緣法界未曾動出而能徧往無邊國土由親近善知識能常徧入淨法界門離去來想徧往十方爾時善財童子發是念已卽詣喜目夜神所見彼夜神在於如來衆會道場坐蓮華藏師子之座入大速疾普喜幢無垢解脫門於其身上一一毛孔出無量種變化身雲隨其所應以妙言音而爲說法普攝無量一切衆生皆令歡喜而得利益所謂出無量化身雲充滿十方一切世界說諸菩薩行檀波羅蜜於一切事皆無戀著於一切衆生普皆施與法界一相其心平等供養承事無有輕慢內外悉施難捨能捨又從一一毛孔出等衆生數無量化身雲充滿法界普現一切諸衆生前說持淨戒無有闕犯修諸苦行皆悉圓滿於諸世間無所有依於諸境界無所愛

著說在生死輪迴往返說諸人天盛衰苦樂說諸境界皆是不淨說有爲法皆是無常說諸有漏悉苦無味說一切法空無有我令諸衆生捨離想心妄見顛倒住如來境了不思議常樂我淨究竟真實持如來戒如是演說種種戒行戒香普惠令諸衆生悉得成熟又從一一毛孔出等衆生數種種身雲說能忍受一切衆苦所謂割截捶楚呵罵輕辱其心泰然無有忿恚安受諦思不動不亂於一切行不卑不高於諸衆生不起我慢於諸法性審諦觀察說菩提心無有窮盡心無盡故智亦無盡普斷一切衆生煩惱說諸衆生卑賤醜陋形相鄙惡不具足身令生厭離方便除滅如是等因讚諸如來清淨妙色無上之身令生欣樂如是方便成熟衆生又從一一毛孔出等衆生數種種身雲隨諸衆生心之所樂說勇猛精進修一切智助道之法勇猛精進摧伏魔怨勇猛精進發菩提心不動不退勇猛精進度諸衆生出生死海勇猛精進除滅一切惡道諸難勇猛精進以智慧力壞無智山勇猛精進供養奉事一切如來心無疲厭勇猛精進受持一切諸佛法輪常不忘失勇猛精進壞散一切諸重煩惱大障礙山勇猛精進教化成熟一切

衆生勇猛精進嚴淨一切諸佛刹土如是方便成熟
衆生又從一一毛孔出等衆生數無量身雲以種種
方便令諸衆生除滅愁歎憂悲苦惱心生歡喜捨離
惡意獸一切欲爲說慚愧令諸衆生藏護諸根爲說
無上清淨梵行爲說諸欲是魔境界令生恐怖爲現
不樂世間欲樂住法園苑受於法樂隨其次第入深
禪定諸三昧樂令思惟觀察除滅一切所有煩惱讚
歎心性顯示無生又爲演說一切菩薩諸三昧海神
力變現自在遊戲令諸衆生歡喜適悅離諸恐怖其
心清淨心性調柔堪任受用諸根明利愛重於法修
習增長以是方便成熟衆生又從一一毛孔出等衆
生數種種身雲爲說往詣一切佛刹親近承事供養
諸佛及以師長真善知識受持一切諸佛法輪精勤
不懈又爲演說稱讚一切諸如來海觀察一切諸法
門海顯示一切諸法性相開闡一切諸三昧門照智
慧境界枯竭一切衆生疑海示金剛智壞邪見山昇
慧日輪破諸疑暗皆令歡喜成一切智又從一一毛
孔出等衆生數種種身雲現種種色相種種形貌不
思議身普詣一切諸衆生前隨其所應以種種言辭
辯才訓釋而爲說法或說世間神通福力或說三界

皆是可怖令其不作世間業行離三界處出見稠林
或爲稱讚一切智道令其超越一切聲聞辟支佛地
或爲演說不住生死不住涅槃令其不著有爲無爲
於敬於慢心無憂喜或爲演說住於天宮乃至道場
成等正覺令其欣樂發菩提意顯示如是方便善巧
波羅蜜門教化成熟一切衆生皆令究竟得一切智
又從一一毛孔出一切世界極微塵數種種身雲普
現一切諸衆生前於念念中示普賢菩薩一切行願
於念念中示清淨大願充滿法界於念念中示嚴淨
一切世界海於念念中示供養一切如來海於念念
中示入一切法門海於念念中示入一切刹海極微
塵數諸世界海於念念中示於一切刹盡未來劫清
淨修行一切智道於念念中示入十方一切如來力
於念念中示入三世一切方便海於念念中示往一
切刹現種種神通變化自在於念念中示一切菩薩
種種行願顯示如是願波羅蜜令諸衆生住一切智
如是所作恒無休息又從一一毛孔出等一切衆生
種種心數變化身雲普詣一切諸衆生前說諸菩薩
集一切智助道之法無邊際力不破壞力無窮盡力
修無上行不退轉力無間斷力於生死法無染著力

能破一切諸魔軍力遠離一切煩惱垢力能破一切業障山力住一切劫修大悲行無疲倦力震動一切諸佛刹土令諸衆生生歡喜力普於世間轉法輪力以如是等力波羅蜜方便成熟令諸衆生至一切智又從一一毛孔出等一切衆生種種心數種種色相變化身雲普詣十方無量世界隨衆生心演說一切菩薩智行所謂說入一切衆生界海智說入一切衆生心海智說入一切衆生根海智說入一切衆生行海智說度一切衆生成熟調伏未曾失時智說出一切法界音聲智說念念佛一切法界海智說念念佛

一切世界海滅壞智說念念佛一切世界海成住莊嚴形相差別智說念念佛通自在親近供養一切如來聽受法輪智顯示如是智波羅蜜令諸衆生皆大歡喜調暢適悅其心寂靜生決定解求一切智無有退轉如說菩薩諸波羅蜜種種調伏成熟衆生於種種時隨種種心知種種根令其明利有所堪任能生愛樂深信解力於一切智究竟圓滿如是宣說一切菩薩種種行法而爲利益成熟衆生亦復如是又於一一毛孔現彼夜神從初發心所集功德所謂承事諸善知識親近諸佛修習善法行施波羅蜜難捨能

捨行戒波羅蜜棄捨王位富貴自在宮殿眷屬以增
勝心出家學道行忍波羅蜜能忍世間一切難行種
種苦事及以菩薩圓滿清淨所修苦行所持正法皆
悉堅牢其心不動亦能忍受一切衆生於已身心惡
作惡說忍一切業皆不失壞忍一切法深信決定生
正解心忍諸法性能諦思惟無有分別行精進波羅
蜜起一切智行成一切佛法普偏成熟而無退轉行
禪波羅蜜滿足清淨其禪波羅蜜所有資具所有勤
求所有修行所有成就所有清淨所有圓滿起三昧
神通所入三昧海門皆悉顯示行般若波羅蜜心無
取著其般若波羅蜜所有資具所有清淨大智慧日
大智慧雲大智慧藏大智慧海大智慧行大智慧門
皆悉顯示復不修行方便善巧波羅蜜門其方便波
羅蜜所有資具所有修行所有體性所有理趣所有
清淨所有相應事皆悉顯示行願波羅蜜其願波羅
蜜所有體性所有成就所有修習所有相應事皆悉
顯示行力波羅蜜其力波羅蜜所有資具所有因緣
所有理趣所有演說所有相應事皆悉顯示行智波
羅蜜其智波羅蜜所有資具所有體性所有修行所
有成就所有出生所有清淨所有處所所有增長所

有深入所有光明所有顯示所有理趣所有相應事
所有能揀擇所有諸行相所有相應法所有所攝法
所知法所知業所知刹所知劫所知世所知佛出現
所知佛所知菩薩所知菩薩心菩薩位菩薩資具菩
薩發趣菩薩廻向菩薩所行菩薩大願菩薩法輪菩
薩揀擇菩薩法海菩薩法門海菩薩法旋流菩薩法
伏藏菩薩法理趣如是等智波羅蜜相應境界皆悉
顯示從彼夜神一一毛孔皆悉具足顯現如是十波
羅蜜教化成熟一切衆生爾時善財童子見喜目觀
察一切衆生夜神復於一一諸毛孔中出興無量衆
生形相相似身雲所謂出興色究竟天善現天善見
天無熱天無煩天相似身雲如是出興廣果福生無
雲天相似身雲出興徧淨無量淨少淨天相似身雲
出興極光淨無量光少光天相似身雲出興大梵
輔梵衆天相似身雲出興他化自在天化樂天兜率
陀天須夜摩天忉利天如是天王及天女諸天子
衆各相似身雲出興提頭賴吒乾闥婆王乾闥婆子
乾闥婆女相似身雲出興毗樓勒叉鳩槃茶王鳩槃
茶子鳩槃茶女相似身雲出興毗樓博叉龍王龍子
龍女相似身雲出興毗沙門夜叉王夜叉子夜叉女

相似身雲出興大樹緊那羅王緊那羅子緊那羅女
相似身雲出興妙智摩睺羅伽王摩睺羅伽子摩睺
羅伽女相似身雲出興大勢速疾力迦樓羅王迦樓
羅子迦樓羅女相似身雲出興羅睺阿脩羅王阿脩
羅子阿脩羅女相似身雲出興閻羅法王閻羅王子
閻羅王女相似身雲出興世間一切人王及王夫人
王子王女相似身雲出如是等一切種類諸趣身雲
出興一切聲聞獨覺一切菩薩及諸佛衆相似身雲
出興一切地神水神火神風神河神海神山神林神
主稼神主藥神主樹神主地神主城神主晝神主夜
神主空神主方神身衆神足行神主道場神乃至執
金剛神等相似身雲周徧十方充滿法界於彼一切
諸衆生前現種種聲所謂風輪聲水輪聲火燄聲海
潮聲地震聲大山相擊聲天城震動聲摩尼相擊聲
天王聲龍王聲夜叉王聲乾闥婆王聲阿脩羅王聲
迦樓羅王聲緊那羅王聲摩睺羅伽王聲人王聲梵
王聲天女歌詠聲諸天音樂聲摩尼寶王聲聲聞聲
獨覺聲菩薩聲以如是等種種音聲宣說喜目觀察
衆生夜神從初發心所集功德相續次第所習善根
相續次第發菩提心相續次第所修無量諸波羅蜜

相續次第死此生彼及其名號相續次第親近善友
承事諸佛相續次第聽諸如來種種法輪相續次第
受持正法相續次第修菩薩行相續次第入諸三昧
相續次第以三昧力普見諸佛相續次第普見諸刹
相續次第普知諸劫相續次第深入法界相續次第
觀察衆生相續次第入法教海相續次第知諸衆生
死此生彼相續次第得淨天耳聞一切聲種種辯才
隨順思惟相續次第得淨天眼見一切色種種形相
善巧觀察相續次第得他心智知衆生心相續次第
得宿住智知前際事相續次第得不思議無依無作
神足智通自在遊行徧十方刹相續次第得菩薩差
別解脫入菩薩不可思議解脫教海住菩薩三昧神
通得菩薩勇猛遊步住菩薩心想爲菩薩眷屬入菩
薩道場如是一切所有功德相續次第皆悉演說分
別顯示成就衆生如是說時於念念中十方各嚴淨
不可說不可說諸佛刹土度脫無量惡趣衆生令無
量衆生生天人中富貴自在令無量衆生出生死海
令無量衆生安住聲聞辟支佛地令無量衆生得菩
薩法門令無量衆生住如來智地

大方廣佛華嚴經卷第十八

校譌

第九紙

八行貌北
藏作貌

金壇子門虞氏
華嚴經普賢行願品第十八卷

范氏共施賈刻此
顧寧唐士登書

秀水錢晉刻
汝寧比丘如清

萬曆辛卯夏清涼山妙德庵識

大方廣佛華嚴經卷第十九

唐罽賓國三藏般若奉詔譯

入不思議解脫境界普賢行願品之十九

爾時善財童子見聞如上所現一切諸希有事念念觀察思惟解了隨順修行深入安住平等成就承佛威力及解脫力得菩薩不可思議大速疾力普喜幢無垢解脫門何以故與彼夜神於往昔時同修行故如來威力所加持故不思議善根所祐助故得菩薩諸根故生如來種中故得善友力所攝受故受諸如來所護念故毗盧遮那如來曾所化故彼分善根已

成熟故堪修普賢菩薩行故爾時善財童子得此解脫已心生歡喜十方如來威神力故合掌向喜目觀察夜神以偈讚曰

天於無量大劫中

善學諸佛甚深法

普隨一切衆生類

顯現色身無所著

了知沉溺諸衆生

無主無親嬰妄想

爲現神通種種身

宣示正法令調伏

法身寂靜恒無二

無依無著無分別

爲化衆生普現身

演說正法令調伏

仁於諸蘊及界處

了法皆空無所著

示現色相莊嚴身

演說正法令調伏

不著内外一切法

已出無邊生死海

欲拔衆生離有無

現同類身無不徧

仁心能於一切境

未離諸欲及分別

普爲癡暗諸衆生

顯自覺法令調伏

仁心能住於三昧

經於多劫恒不動

於身毛孔出化雲

爲供十方諸善逝

汝入如來十力門

念念方便無邊際

隨應化現各不同

普攝一切諸羣品

汝審諦觀諸有海

種種業力具莊嚴

於無障礙道法中 爲說令心得清淨
汝身色相如普賢 清淨莊嚴妙無比
隨諸衆生種種欲 普能顯示於世間
爾時善財童子以妙偈讚夜神已白言聖天汝發阿
耨多羅三藐三菩提心其已久如得此解脫爲幾時
耶爾時夜天以偈答曰

我念過去經多劫 過於佛刹微塵數
刹號摩尼安樂光 劫名寂靜大音聲
刹中所有四天下 百千俱胝那由他
其中有一四天下 名摩尼山衆色光
其中所有廣大城 百千萬億那由他
於中有一王都城 名衆香光摩尼種
具足妙寶所莊嚴 人天見者皆欣悅
彼時有一轉輪王 名廣大身爲世主
三十二相皆圓滿 種種隨好以嚴身
真金妙色光明聚 清淨蓮華之所生
騰空自在放身光 其光普及闍浮界
其轉輪王有千子 威勢勇猛相端嚴
良臣輔佐一俱胝 智慧多聞咸具足
后妃嬪御有十億 皆如天女悅人心

能隨王意性調柔 恒起慈心而給侍
時王以法利群生 正法宣流四天下
鐵圍大地皆臣屬 富樂豐饒人庶歡
我時與王爲寶女 言詞具足梵音聲
身光照及千由旬 光如無垢真金色
有時日光既已沒 所奏音樂咸寂然
大王及我諸妃嬪 一切無不皆安寢
彼時有佛出世間 號曰吉祥功德海
顯現無量神通力 普偏十方諸世界
復出無量光明海 等一切刹微塵數
示現種種自在身 徒滿十方無有盡
大地諸山皆震動 發聲普告佛出興
天人龍衆阿脩羅 聞佛出世皆歡喜
復從一一毛孔中 出佛化身神變海
十方世界皆充滿 隨衆生心說妙法
我時於彼夜夢中 見佛種種諸神變
亦聞演說甚深法 愛樂喜歡未曾有
時有十千主夜神 在王宮上空中住
同時讚佛諸功德 以妙言音覺悟我
勝智賢后汝應起 佛已出興於汝國

百千劫海難值遇 見者利樂皆清淨
我時惺寤心忻敬 卽覩清淨妙光明
觀此光相從何來 見佛坐於樹王下
三十二相莊嚴體 妙色出過寶山王
復於一切毛孔中 普放廣大光明海
我時見已生歡喜 卽發廣大希有心
願我亦當如世尊 具足廣大神通力
我於是時尋覺悟 大王妃嬪諸眷屬
咸令見佛大光明 一切身心皆慶悅
我時與彼轉輪主 四兵千億同圍遶
及與無量諸衆生 俱行共詣如來所
我時經於二萬歲 一心供養彼如來
七寶大地四天下 敬心奉施曾無倦
時彼如來爲我說 修多羅海功德雲
以佛威力應群心 發起莊嚴諸願海
彼時夜神覺悟我 令我見佛心增益
我時願得如是身 覺悟一切諸放逸
我從於此初發心 願趣無上菩提道
往來生死諸有海 能滅衆苦心無失
此後復以深信心 供佛十億那由他

恒受人天安隱樂

饒益一切諸群生

初佛號名吉祥海

二名功德無盡燈

第三佛號妙寶幢

第四佛號虛空慧

第五佛號拘蘇摩

第六智月無所著

第七法月光明王

第八智輪光普照

第九如來兩足尊

號爲寶燄山燈光

第十調御天人師

名曰三世大光音

如是十億那由他

我皆供養心歡喜

然猶未得智慧眼

入此甚深解脫海

從此次第復有刹

名一切佛寶光明

其劫名爲天吉祥

五百如來出興世

初佛月輪圓滿光

第二佛名爲日燈

第三佛號星宿幢

第四佛名妙寶峯

五華燄光六海燈

七燄吉祥八天德

第九法王號光幢

第十普智光明王

如是五百諸如來

一一我皆曾供養

尚於我愛阿賴耶

不知無依計爲有

從此次第復有劫

名衆妙色梵光明

世界具足寶莊嚴

名勝吉祥華燈雲

彼中無量佛出興

一一我皆曾供養

亦供如來大衆會

恭敬聽法心歡喜

初佛號曰寶須彌

二名光明功德海

三名法界妙音幢

四號法海大聲王

五法幢佛六威嚴

七法力光八空智

第九法燄須彌光

第十佛名雲吉祥

如是上首等諸佛

一一我皆親供養

未能明了深法性

而得入於諸佛海

此後次第復有劫

其劫名爲月吉祥

當於彼時有佛刹

號曰日燈吉祥幢

彼時有佛出於世

其數八十那由他

廣陳一切莊嚴具

皆以深心而敬奉

最初甘露味王佛

第二佛名大樹王

三名功德須彌峯

四名平等妙寶眼

五光徧照六光嚴

七法海佛八勝力

九名世主威力賢

第十一劫法光王

如是上首等諸佛

我悉供養咸親近

然猶未獲深妙智

能入甚深諸法海

此後無間復有劫

名爲寂靜智威力

其刹名曰普光雲

金剛堅固摩尼寶

無數莊嚴具衆色

於中千佛出興世

衆生多淨少煩惱 離垢衆會具莊嚴
最初佛號金剛齋 第二受持無著力
第三法界影像佛 四普光照十方王
第五大悲威德佛 第六名爲苦行海
第七忍辱圓滿燈 第八覺法圓滿光
第九佛號海莊嚴 最後寂靜光王佛
如是上首等十佛 我悉一一曾供養
然於法性未深悟 平等如空性清淨
及偏遊行一切刹 而於彼刹修諸行
次第無間復有劫 其劫名爲妙出生
刹號香燈雲吉祥 於中淨穢恒相雜
於中億佛出興世 彼刹及劫妙莊嚴
彼佛所說妙法輪 我以念力皆能受
初無垢稱二法海 第三佛號雲吉祥
四名法主五德雲 六名法山須彌冠
第七智燄威德佛 第八虛空大聲佛
第九復有兩足尊 名普出生殊勝燈
最後第十無上士 號眉間光智吉祥
供彼一切人中尊 未能淨治無礙道
次第無間復有劫 名集堅固妙高王

刹號寶峯勝頂禮

上妙雜寶爲嚴飾

有五百佛於中現

色身徧滿勝莊嚴

供彼一切自覺尊

求此甚深真解脫

第一功德圓滿佛

二寂靜音三海山

四威德佛五山王

六須彌相大雲聲

七法自在八功德

九福須彌十寂光

此等上首五百佛

我皆次第興供養

彼佛所有真淨道

我皆普入盡無餘

然未能於佛法中

成就甚深平等忍

次第無間後有劫

名爲安樂莊嚴光

刹號寂音瓔珞智

衆生清淨少煩惱

於中所有諸佛現

其數八十那由他

我悉供彼人中尊

修佛最勝清淨道

初佛華聚拘蘇摩

二海藏佛三德生

第四佛號天王髻

第五摩尼勝藏王

第六佛名真金山

第七佛號寶聚尊

第八法幢九財勝

最後名爲智慧王

如是上首天人主

我皆供養無不盡

此後次第復有劫

其劫名爲千吉祥

刹號妙燈變化幢

億那由他佛出現

最初佛名寂靜幢 第二佛號奢摩他
第三寂靜百燈雲 第四世尊吉祥王
第五佛號最勝主 第六佛名如雲行
第七如來日威德 第八勝法須彌燈
九名天燄妙吉祥 十師子吼智慧燈
如是上首諸善逝 我悉供養無空過
然猶未得清淨忍 入彼甚深諸法海
此後次第復有劫 名爲無著徧莊嚴
當於彼時有世界 名無邊光普吉祥
其中諸佛出興世 三十六億那由他
初佛名普功德雲 第二無間虛空心
三佛妙生具莊嚴 四名法海大吼聲
第五法界大音聲 六妙變化功德山
第七普力威德尊 第八出生法海聲
第九海燈功德山 第十隨順智日王
彼所出現諸如來 我皆供養心歡喜
最後有佛出興世 名寶吉祥功德幢
我爲天后名月面 供養於彼人中尊
時佛爲我說契經 名無依著莊嚴門
成就出生諸願海 我以念力皆受持

獲得廣大清淨眼

寂靜總持三昧力

恒於相續念念中

悉見十方諸佛海

得彼諸佛大悲藏

及普方便大慈門

增長如空大智心

成就無量如來力

見諸衆生顛倒心

堅執常樂我淨想

黑暗愚癡雲所迷

惑亂妄起諸煩惱

行止恒遊邪見林

來往入於貪欲海

積集種種輪迴業

墮落種種諸苦趣

一切衆生諸趣中

各隨其業而受身

生老病死所逼迫

身心恒受無邊苦

爲欲安樂彼衆生

發起最勝菩提志

願如十方一切刹

所有出現十力尊

爲求成佛利衆生

起大願雲周法界

從是具修功德聚

趣入佛道總持門

發起廣大行願雲

速疾普入無生道

具足廣大波羅蜜

法界出生無不徧

速疾普入於諸地

亦入三世方便法

一念普修一切佛

所有地度無礙行

我時得爲佛長子

得入普賢深行願

了十法界差別門

通達甚深諸佛教

善男子於汝意云何彼時轉輪聖王名十方主能建
正法紹繼佛種使不斷者豈異人乎文殊師利童子
是也爾時夜神覺悟我者普賢菩薩之所化耳善男
子我於彼時爲王寶女蒙彼夜神覺悟於我令我見
佛發阿耨多羅三藐三菩提心從是以來經佛刹極
微塵數劫未曾生於惡道之中常生人天恒得自在
於一切處不捨見佛其心堅固乃至於功德幢寶吉祥
燈佛所得此菩薩大速疾力普喜幢無垢解脫以
此解脫能得如是功德嚴身種種供養親近諸佛及
善知識成熟調伏利益衆生令修妙行善男子我唯
知此大速疾力普喜幢無垢解脫門如諸菩薩摩訶
薩於念念中普詣一切諸如來所速疾趣入一切智
海於念念中以發趣門入於一切諸大願海於念念
中以願海門盡未來劫念念出生一切諸行一一行
中變化出生一切佛刹極微塵數身一一身徧入一
切法界門一一法界門一切佛刹中應衆生心說諸
妙行一切佛刹一一塵中悉見無邊諸如來海一
如來所悉見徧法界諸佛神通遊戲自在一一如來
所悉見往劫修諸菩薩種種妙行一一如來所受持
守護所有法輪常不忘失悉見三世一切如來種種

神變方便教誨而我云何能知能說彼功德行善男子於此如來大衆會中有主夜神名普救護一切衆生成威德吉祥汝詣彼問菩薩云何入菩薩行圓滿清淨諸菩薩道時善財童子禮夜神足繞無數市殷勤瞻仰一心戀慕辭退而去爾時善財童子從喜目夜神所聞普喜幢解脫深信趣入隨順觀察念善知識所有教誨心無暫捨作意思惟諸根不散一心願得遇善知識普於十方勤求匪懈願常親近諸善知識生諸功德於善知識承事供養常令歡喜與善知識所有善根同一體性得善知識巧方便行無能破壞依善知識速疾增長入精進海與善知識隨順共住常不遠離作是願已往詣普救衆生成威德神所時彼夜神卽爲善財示現菩薩調伏衆生解脫神力以諸相好莊嚴其身卽於眉間放大光明名普智燄無垢星宿幢無量光明以爲眷屬其光普照一切世間照世間已入善財頂充滿其身善財卽時得極清淨圓滿三昧得三昧已悉見喜目普救二神兩處中間所有一切地塵水塵及以火塵金剛摩尼衆寶微塵華香瓔珞諸莊嚴具如是一切所有極微一一塵中各見佛刹極微塵數世界成壞及見一切地水火風諸

大積聚亦見一切世界連接皆以地輪任持而住種
種形像種種眷屬種種山海種種河池種種樹林種
種宮殿所謂天宮殿龍宮殿夜叉宮殿乾闢婆阿脩
羅迦樓羅緊那羅摩睺羅伽人非人等宮殿屋宅種
種莊嚴地獄畜生閻羅王界一切住處諸趣輪轉生
死往來隨業受報各各差別普偏出生不相雜亂靡
不知見善財又見一切世界種種差別所謂或有世
界襍穢或有世界清淨或有世界趣雜穢或有世界
趣清淨或有世界雜穢清淨或有世界清淨雜穢或
有世界其形平正或有世界隨心想住或有覆住或
有側住如是世界一切趣類一切生中皆悉見此普
救衆生成威德夜神於一切時徧一切處隨諸衆生如
是壽量如是信樂形貌言辭行解差別以方便力普
現其前隨宜調伏而成熟之令地獄衆生免諸苦毒
令畜生衆生不相食噏令閻羅界餓鬼衆生無有飢
渴令諸龍等離一切怖令欲界衆生離欲界怖令人
趣衆生離暗夜怖毀呴怖惡名怖大衆怖不活怖死
怖惡道怖斷善根怖退菩提心怖遇惡知識怖離善
知識怖墮二乘地怖種種生死怖異類衆生同住怖
惡時受生怖惡種族中受生怖造惡業怖業煩惱障

怖執著諸相種種繫縛怖如是等怖悉令捨離廻向
菩提善財又見一切衆生卵生胎生濕生化生有色
無色有想無想非有想非無想普現其前常勤救護
爲成就菩薩大願力故深入菩薩三昧力故堅固菩
薩神通力故出生普賢行願力故增廣菩薩大悲海
故得普覆衆生無礙大慈故得普與衆生無量喜樂
故得普攝衆生智慧方便故得菩薩解脫自在神通
故嚴淨一切諸佛刹故覺悟了知一切法故承事供
養一切佛故受持一切諸佛教故積集一切勝善根
故修諸菩薩諸妙行故入衆生心無障礙故知衆生
根能成熟故淨一切衆生信解海故破一切衆生無
知闇故得一切智清淨光明故爾時善財童子見普
救衆生成威德夜神入調伏一切衆生解脫門現不思
議甚深境界神通力已心大歡喜踊躍無量頭面作
禮一心瞻仰時彼夜神卽捨菩薩種種相好妙莊嚴
身還復本形而不捨其神通變化自在威力爾時善
財童子恭敬合掌却住一面觀察夜神以偈讚曰

我見仁尊今所現

如是廣大神通力

令我發生歡喜心

卽說妙偈而稱讚

我見聖者廣大身

殊勝妙寶莊嚴已

譬如星月處空中 難思相好皆微妙
身放清淨光明輪 量等無邊刹塵數
種種色相皆殊妙 普照十方無不徧
於仁一一毛孔出 等諸衆生心數光
光中佛坐寶蓮華 化現能滅衆生苦
光中復出妙香雲 普熏一切衆生類
復能普雨衆妙華 普供十方一切佛
眉放廣大光明聚 一寶光無垢等須彌
普照十方世界中 觸者令滅愚癡暗
口常普放無垢光 光輪廣大如千日

普照十方諸世界 毗盧遮那所行境
眼放無垢光明雲 光明晃耀如星月
普照一切十方刹 減除三有諸癡翳
仁所化現種種身 其身相狀等衆生
充滿十方法界中 調伏無量衆生海
令身普往徧十方 悉現一切衆生前
滅除王賊水火怖 令心調伏生歡喜
我承喜眼天神教 念尊功德來奉事
見尊毫相放光雲 圓明廣大無諸垢
此光普照於十方 悉滅衆生煩惱暗

顯現種種神通力 然後而來入我身
我時遇此圓滿光 身心安樂生歡喜
得百總持三昧海 普見十方善逝尊
我於所有經行處 悉見一切極微塵
於彼一一極微中 各見佛刹如塵數
或有塵中無數刹 一向雜染恒濁穢
衆生無救受諸苦 發聲悲歎常號泣
或有諸刹染淨雜 衆生少樂多憂苦
現佛獨覺聲聞形 大悲往彼而救度
有利先淨後雜染 男女端嚴皆可樂

菩薩充滿具莊嚴 住持無量諸佛法
十方一一極微中 皆有無量淨刹海
毗盧遮那於往昔 普修行海所莊嚴
佛於十方一切刹 悉坐最勝菩提場
成等正覺現神通 說法調伏羣生類
我見普救威德天 其身普往無邊刹
毗盧遮那境界中 供事十方一切佛

爾時善財童子說此偈已白普救衆生威德神言希
有聖者乃能住此甚深解脫得此解脫其已久如本
修何行而能清淨夜神告言善男子此處難知一切

世間天人二乘所不能測何以故此是住普賢菩薩
行者境界故隨順大悲藏者境界故救護一切衆生
者境界故能淨一切三惡八難者境界故能於一切諸佛刹中
清淨莊嚴一切佛刹者境界故能持一切諸佛正法者境
紹繼佛種不斷者境界故能於一切諸佛正法者境
界故能於一切劫修菩薩行成滿大願海者境界故
能於一切法界海以清淨智光滅無明闇障者境界
故能以一念智慧光明普照一切三世方便海者境
界故我當承佛威力爲汝宣說善男子乃往古世過
佛刹極微塵數劫爾時有劫名無垢圓滿世界名毗
盧遮那威德吉祥有須彌山極微塵數如來於中出
現其佛世界以一切香王摩尼寶金剛爲體以天龍
宮殿衆寶莊嚴住無垢光明摩尼王海上其形正圓
清淨無垢一切瓔珞嚴具帳雲而覆其上一切莊嚴
摩尼輪山千百圍遶十萬億那由他四天下皆妙莊
嚴或有四天下惡業衆生於中止住或有四天下雜
業衆生於中止住或有四天下善根衆生於中止住
或有四天下一向清淨諸大菩薩之所止住善男子
彼界東際輪圍山側有四天下名寶燈華幢國界清
淨安隱豐樂不藉耕耘而生稻粱皆由往業勝力成

熟宮殿樓閣悉皆奇妙諸如意樹處處行列種種香
樹恒出香雲諸末香樹雨末香雲種種鬟樹恒出鬘
雲種種華樹雨不思議衆妙華雲種種寶樹雨大摩
尼珍奇妙寶無量色光周帯照耀諸音樂樹出諸音
樂隨風吹動演妙音聲日月光明摩尼寶王普照一
切晝夜受樂無時間斷此四天下有百萬億那由他
諸王國土一一國土有千大河周帯圍遶一一皆以
妙華覆上隨流漂動出天樂音一切寶樹列植其岸
種種珍奇以爲嚴飾舟船來往稱情嬉戲種種資緣
受用安樂一一河間有百萬億城一一城有百萬億
那由他聚落如是一切城邑聚落各有無量百千億
那由他宮殿園林周市圍遶以爲眷屬此四天下閻
浮提中有一國土名寶華燈安隱豐樂人民熾盛宮
殿嚴好自在圓滿其中衆生具行十善有轉輪王於
中出現名毗盧遮那寶蓮華藏於蓮華中歎然化生
三十二相莊嚴其身七寶成就王四天下恒以正法
教導羣生王有千子端正勇健威力自在能伏怨敵
百萬億那由他宮人姝女以爲眷屬皆悉與王同種
善根同修諸行同時誕生同以寶飾瓔珞莊嚴端正
殊妙猶如天女身真金色常放光明諸毛孔中恒出

妙香良臣猛將具足十億王有正妃名具足圓滿吉祥面是王女寶端嚴殊特觀者無狀最勝清淨皮膚金色目髮紺青言同梵音身有天香常放光明照千由旬其妃有女名普喜吉祥蓮華眼形體端嚴德行具足相好圓滿如轉輪王衆生見者心無狀足彼時衆生壽命無量或有不定而中夭者種種形色種種音聲種種名字種種族姓長短大小勇怯愚智貧富苦樂信樂勝劣無量品類皆悉不同時或有人謂餘人言我身端正汝形醜陋作是語已互相毀辱集不善業以是業故壽命色力一切樂事悉皆損減

大方廣佛華嚴經卷第十九

校譌

第四紙

十二行惺 南藏作寢

第七紙

十二行齋 南藏作齊

金壇王秉鉞爲遙授布政司經歷父堅丙申二月三十日生祈保壽考康寧身心調適母鄧氏華嚴經普賢行願品第十九卷延壽康榮各施刻對既寧唐士登書江寧張應榜刻萬曆辛卯夏清涼山妙德庵識

大方廣佛華嚴經卷第二十

唐罽賓國三藏般若奉詔譯

入不思議解脫境界普賢行願品之二十

爾時寶華燈城北有菩提樹名普光徧照法雲聲幢
以念念顯示一切如來莊嚴道場金剛堅固摩尼寶
王而爲其根一切摩尼以爲其榦衆雜妙寶以爲其
葉枝條莖果次第分布並相稱可四方上下圓滿莊
嚴放種種色寶燄光明出妙音聲演說一切諸佛如
來自在神通甚深境界於彼樹前有一香池名寶華
光法雲聲香水盈滿妙寶爲岸百萬億那由他寶樹

圍遶一一樹形如菩提樹衆寶瓔珞周帯垂下復有無量宮殿樓閣衆寶所成周徧道場以爲嚴飾彼香池內出大蓮華名普現三世一切如來莊嚴境界雲須彌山極微塵數如來於中出現其第一佛名普智寶燄吉祥威德王於此華上最初得阿耨多羅三藐三菩提無量千歲演說妙法成就衆生其彼如來未成佛時十千年中菩提樹王放大光明顯現神通成熟衆生所謂十千年放淨光明名一切衆生離垢燈若有衆生遇斯光者心自開悟知十千年後佛當出現九千年前放淨光明名具足無垢吉祥藏若有衆生遇斯光者得清淨眼見一切色知九千年後佛當出現八千年前放大光明名一切衆生業果音聲若有衆生遇斯光者悉能自知業海差別種種果報知八千年後佛當出現七千年前放大光明名生一切善根音聲若有衆生遇斯光者一切善根悉皆圓滿知七千年後佛當出現六千年前放大光明名佛不思議境界音聲若有衆生遇斯光者其心廣大普得自在知六千年後佛當出現五千年前放大光明名嚴淨一切佛刹音聲若有衆生遇斯光者悉見一切清淨佛土知五千年後佛當出現四千年前放大

光明名一切如來境界無襍亂燈若有衆生遇斯光者悉能深入如來境界徧一切處往觀諸佛知四千年後佛當出現三千年前放大光明名一切衆生普照三世現前燈若有衆生遇斯光者悉能現見一切如來諸本事海知三千年後佛當出現二千年前放大光明名三世智電燈若有衆生遇斯光者則見一切如來過去相應行海知二千年後佛當出現一千年前放大光明名如來無翳智慧燈若有衆生遇斯光者具足普眼能見諸佛神通變化淨一切刹知一千年後佛當出現一百年前放大光明名令一切衆生皆得見佛集諸善根若有衆生遇斯光者則得成就見佛三昧知百年後佛當出現次七日前放大光明名一切衆生大喜愛樂音若有衆生遇斯光者則得見佛能生愛敬知七日後佛當出現善男子如是種種無量無邊清淨光明十千年中乃至七日調伏衆生令其成熟滿七日已一切世界悉皆震動純一清淨無諸穢雜念普現十方一切清淨佛刹亦現彼刹種種莊嚴若有衆生根性淳熟應見佛者咸詣道場爾時彼世界中一切輪圍一切須彌一切諸山一切河海一切大地一切城邑一切垣牆一切宮殿

一切音樂一切資具一切瓔珞一切語言皆出音聲
讚說一切諸佛如來神通境界變化莊嚴又出一切
香雲一切燒香雲一切末香雲一切塗香雲一切香
摩尼形像雲一切摩尼衣雲一切寶談雲一切藏
雲一切瓔珞雲一切妙華雲一切音樂雲一切如來
光明雲一切如來圓光雲一切如來願聲雲一切如
來言音海雲一切如來種種相好色光明雲顯示如
來出現世間不思議相善男子此普現三世一切如
來莊嚴境界大寶蓮華王有十佛刹極微塵數妙寶
蓮華以爲眷屬周布圍遶其諸蓮華一一臺上皆有
摩尼寶師子座一一座上皆有菩薩結跏趺坐善男
子彼普智寶談吉祥威德王如來於此成阿耨多羅
三藐三菩提時卽於十方一切世界成阿耨多羅三
藐三菩提隨衆生心悉現其前爲轉法輪於一一世
界令無量衆生離惡道苦令無量衆生生人天中令
無量衆生住於聲聞辟支佛地令無量衆生成就出
離菩提之行令無量衆生成就無垢勇猛幢菩提之
行令無量衆生成就清淨法光明菩提之行令無量
衆生成就威德清淨根菩提之行令無量衆生成就
隨順平等力菩提之行令無量衆生成就現前入法

城菩提之行令無量衆生成就徧至一切處不可壞
神通力菩提之行令無量衆生普於十方一切如來
應正等覺生希有心安住平等菩提之行令無量衆
生安住三昧門菩提之行令無量衆生成就緣一切
清淨境界菩提之行令無量衆生發菩提心令無量
衆生住菩薩道修菩薩行令無量衆生安住清淨波
羅蜜道令無量衆生住菩薩初地令無量衆生安住
菩薩二地三地乃至十地令無量衆生入於菩薩殊
勝行願令無量衆生安住普賢清淨行願善男子彼
普智寶談吉祥威德王如來現如是等佛不思議自
在神力轉法輪時於彼一一諸世界中隨其所應念
念調伏教化成熟無量衆生時普賢菩薩知寶華燈
王城中衆生自恃色貌及諸境界放逸惛醉而生驕
慢爲欲調伏彼衆生故化現妙身端正殊特往詣彼
城放大光明普照一切令彼聖王及諸妙寶日月星
宿寶樹寶衣摩尼瓔珞衆生身等一切光明威德端
嚴悉皆不現譬如日出衆星奪耀亦如聚墨對闇浮
金時諸衆生各心念言此爲是誰爲天爲梵今放此
光暎蔽一切令我等身所有威德光色端嚴皆不顯
現種種思惟無能解了爾時普賢菩薩在彼輪王宮

殿之上虛空中住而告之言大王當知今汝國中有
佛出興在普光徧照法雲聲幢菩提樹下時輪王女
普喜吉祥蓮華眼見普賢菩薩所現色身光明自在
及聞身上種種瓔珞諸莊嚴具所出妙音生愛敬心
生歡喜心生深信心作如是念願我所有一切善根
得如是身如是莊嚴如是相好如是威儀如是神通
如是威德今此大聖能於衆生生死長夜黑闇之中
放大光明顯示如來出興於世願令於我亦得如是
爲諸衆生作智光明破彼所有無知黑闇願我所在
受生之處常得不離此善知識善男子時毗盧遮那
寶蓮華藏妙吉祥髻轉輪聖王與其寶女千子眷屬
大臣輔佐七寶四兵及其城內無量人衆前後圍遶
以王神力俱昇虛空高一由旬放大光明照四天下
普使一切咸得瞻仰欲令衆生俱往見佛以偈讚曰
佛今已出於世間 普救一切諸羣品

汝等宜應速發心 往詣最勝導師所

經於無量俱胝劫 乃有如來興出世

開示甚深微妙法 普爲利樂諸衆生

佛觀一切諸世間 頽倒無明常翳惑

生死逼迫輪迴苦 而起救護大悲心

無數千萬俱胝劫

修習種種菩提行

成就最勝大悲心

普滅一切衆生苦

頭目耳鼻身手足

如是一切皆能捨

爲證甘露佛菩提

經於無量無邊劫

過於無量俱胝劫

出世導師難可遇

見聞供養及親承

一切獲益無空過

我今與汝俱往詣

觀彼最勝調御師

爲轉無上大法輪

道樹降魔成正覺

汝應觀佛妙色身

放無邊際光明網

從於一一毛孔中

普放無數光明雲

偏照一切諸羣生

咸令愛敬心歡喜

汝等各各應思念

發起廣大精進心

卽時同詣彼如來

親近至誠而供養

爾時轉輪聖王說偈讚佛開悟國內一切衆生已從
輪王善根出十千種大供養雲往詣道場向如來所
謂出一切寶蓋雲一切華帳雲一切寶衣雲一切
香海雲一切寶座雲一切寶幢雲一切宮殿雲一切
妙華雲一切寶鈴網雲一切莊嚴具雲於虛空中周
徧嚴飾到已頂禮普智寶燄吉祥威德王如來足右

繞無數百千萬匝卽於佛前坐普照十方光明摩尼寶蓮華座時輪王女普喜吉祥蓮華眼卽解身上一切瓔珞諸莊嚴具持以奉散時莊嚴具於虛空中變成大摩尼寶蓋有種種色摩尼寶網周匝垂下一切龍王共所執持一切宮殿於中間列十種寶蓋眷屬圍遶形如樓閣內外清淨諸瓔珞雲徧覆其上及諸寶樓香海摩尼種種妙飾以爲嚴好於此蓋中有菩提樹枝葉榮茂普覆法界念念示現無量莊嚴毗盧遮那如來坐此樹下有不可說不可說佛刹極微塵數菩薩前後圍遶一切皆從普賢菩薩行願出生住諸菩薩不可思議無差別住亦見一切諸世間主合掌瞻仰圍遶如來亦見一切如來自在神通之力又見一切諸劫次第世界成壞又亦見彼一切世界一切諸佛出興次第又亦見彼一切世界一一皆有普賢菩薩種種供養一切如來種種調伏一切衆生又亦見彼一切菩薩及其自身莫不皆在普賢身中亦見自身在一切如來前一切普賢前一切菩薩前一切衆生前又亦見彼一切世界一一各有佛刹極微塵數世界種種際畔種種任持種種形狀種種體性種種安布種種莊嚴種種清淨種種莊嚴雲而覆其

上種種劫名種種佛興種種三世種種方處種種住
法界種種入法界種種住虛空種種菩薩莊嚴種種
菩薩住處種種如來菩提場種種如來神通力種種
如來師子座種種如來大會海種種如來衆差別種
種如來巧方便種種如來轉法輪種種如來妙音聲
種種如來言說海種種如來契經雲既見是已其心
清淨生大歡喜時彼如來爲此女人說修多羅名一
切如來轉法輪音十佛刹極微塵數修多羅而爲眷
屬時彼女人聞此經已卽得成就十十三昧門身心
柔軟無有麤強如初受胎如始誕生如娑羅樹初始
生芽彼三昧心柔軟可愛亦復如是所謂現見一切
佛三昧普照一切刹三昧深入一切三世門三昧演
說一切佛法輪三昧了知一切佛願海三昧開悟一
切衆生令出生死苦三昧常願破一切衆生闇三昧
常願滅一切衆生苦三昧常願生一切衆生樂三昧
教化一切衆生不生疲厭三昧一切菩薩住一切地
自在莊嚴三昧一切菩薩無障礙幢三昧普詣一切
清淨佛刹三昧得如是等十十三昧已復得微細等
引謂不動心歡喜心安慰心普光照心順善知識教
心緣甚深一切智心隨順慈無量教行心捨離一切

執著心不住一切世間境界心深入如來境界心普
照一切佛色相海心不散亂心不飄動心無障礙心
無高下心無疲倦心無退轉心得自在心離懈怠心
正念諸法自性心安住一切法門海心修行一切法
門海心了知一切衆生海心救護一切衆生海心普
照一切世界海心普生一切佛願海心悉破一切障
礙山心積集廣大福聚心現見如來十力心普照菩
薩境界心增長菩薩助道心徧緣一切方海心一心
思惟觀察普賢所有大願發一切如來十佛刹極微
塵數平等願海所謂願嚴淨一切佛國願成熟一切
衆生願徧知一切法界願普入一切法界海願於一
切佛刹盡未來劫修菩薩行願盡未來際劫不捨一
切衆生願得親近一切如來願得承事一切善友悉
令歡喜願得供養一切如來悉令徧滿願於念念中
修菩薩行增一切智無有間斷發如是等十佛刹極
微塵數願海成就普賢所有大願海時彼如來復爲
其女開示演說發心已來所種善根所修妙行所得
大果令其開悟甚深信解成就如來圓滿廣大所有
願海一心趣向一切智位善男子復於此前過十大
劫有世界名曰輪光照摩尼王佛號因陀羅幢吉祥

相時此蓮華眼女於彼如來遺法之中普賢菩薩勸其修補蓮華座上故壞佛像既修補已而復彩畫既彩畫已復寶莊嚴發阿耨多羅三藐三菩提心善男子我念過去由普賢菩薩善知識故種此善根從是已來不墮惡趣常於一切天王人王種族中生一切生處身形殊妙端正可喜色相圓滿令人樂見常見於佛常得親近普賢菩薩令我憶持所得法門乃至於今示導開悟成熟於我今生歡喜善男子於意云何爾時毗盧遮那寶蓮華藏妙吉祥髻轉輪王者豈異人乎今彌勒菩薩是也是時王妃具足圓滿吉祥面者具足功德寂靜音海夜神是也今所住處去此不遠時普喜吉祥蓮華眼童女者卽我身是我於昔時身爲童女普賢菩薩勸我修補蓮華座像以爲無上菩提因緣令我發阿耨多羅三藐三菩提心我於彼時初始發心次復引導令我得見普智寶談吉祥威德王如來解身瓔珞散佛供養見佛神變聞佛說法卽得菩薩普現一切世間調伏衆生解脫門從是得見須彌山極微塵數佛我皆尊重恭敬供養聽彼如來種種說法聞法歡喜依教修行於念念中常得見彼一切如來及彼佛刹菩薩大會善男子過彼毗

盧遮那威德吉祥世界無垢圓滿劫已次有世界名
摩尼輪種種妙色莊嚴劫名大光有五百佛於中出
現我皆承事恭敬供養令其歡喜其最初佛名大悲
雲幢我爲夜神見佛出行恭敬供養次有佛出名金
剛那羅延幢我爲輪王親近承事恭敬供養時佛爲
我說修多羅名一切佛出現十佛刹極微塵數修多
羅以爲眷屬我皆受持次有佛出名金剛無礙德我
於彼時爲轉輪王恭敬供養其佛爲我說修多羅名
普照一切衆生根須彌山極微塵數修多羅而爲眷
屬我皆受持次有佛出名火燄山吉祥莊嚴我於彼
時爲長者女供養恭敬其佛爲我說修多羅名普照
三世藏莊嚴闇浮提極微塵數修多羅而爲眷屬我
皆受持次有佛出名一切法海高勝王我爲天王恭
敬供養其佛爲我說修多羅名分別一切法界智五百
修多羅而爲眷屬我皆受持次有佛出名甚深法
吉祥海光我於彼時爲龍王女雨如意摩尼寶雲而
爲供養其佛爲我說修多羅名速疾增長歡喜海百
萬億那由他修多羅而爲眷屬我皆受持次有佛出
名寶峯光燄燈我爲海神雨寶蓮華雲親近承事恭
敬供養其佛爲我說修多羅名法界方便海光明佛

刹極微塵數修多羅而爲眷屬我皆受持次有佛出名功德海光照圓滿吉祥我於彼時爲五通仙現大神力六千諸仙眷屬圍遶雨妙香華高山峯雲而爲供養其佛爲我說修多羅名無著法燈六千修多羅而爲眷屬我皆受持次有佛出名毗盧遮那吉祥藏我於彼時爲主地神名平等利益與無量地神俱雨一切寶樹雲一切寶藏雲一切寶瓔珞雲一切寶莊嚴雲而爲供養其佛爲我說修多羅名出生一切如來智藏無量修多羅而爲眷屬我皆聽聞憶持不忘善男子如是次第五百如來其最後佛名法界虛空寶山圓滿吉祥燈我於彼時身爲妓女名可喜吉祥面遇佛入城歌舞供養承佛威力踊在空中以千妙偈讚歎於佛佛爲於我放眉間光名普照法界光明莊嚴光照我身一切徧滿我蒙光觸卽得解脫名法界方便不退藏門善男子此世界中有如是等佛刹極微塵數劫一切如來於中出現我皆承事恭敬供養令其歡喜彼諸如來爲我演說種種正法我皆憶念如法受持乃至不忘一文一句於彼一一諸如來所稱揚讚歎一切佛法爲無量衆生廣作利益於彼一一諸如來所得現三世法界藏住廣大法界身得

入一切智光明入一切普賢行善男子我依一切智
光明故於念念中見無量佛旣見佛已先所未得先
所未見先所未聞普賢菩薩所有妙行悉得成就何
以故以得一切智光明故差別顯示無量無邊法界
門故爾時普救衆生夜神欲重明此解脫義承佛威
力爲善財童子而說偈言

善財汝應聽我說 甚深難入難見法

普光徧照於三世

一切差別智明門

如我初發菩提心

勤求佛智諸功德

所證無邊解脫門

爲汝宣揚應諦聽

憶昔過刹極微劫

時有劫名無垢輪

刹號勝幢徧照燈

莊嚴廣大無諸垢

於中十力出世間

量與須彌塵數等

初佛寶談吉祥光

第二法王功德幢

第三法幢福須彌

第四無畏自在王

第五佛名寂靜王

第六佛名寂靜城

第七如來名稱山

第八導師須彌德

第九佛號吉祥光

第十名爲月面佛

於此十佛世尊所

令我開悟最初門

此後次第有十佛

相續出興於世間

最初佛號虛空住	第二如來名普光
三名出生住諸方	第四如來正念海
第五佛名高勝光	第六世尊須彌雲
第七如來法燄光	第八如來名稱山
第九出生蓮華王	第十大悲法界花
此十佛海光明照	令我悟入第二門
此後相續時無間	次第復有十佛出
第一如來光幢王	第二佛名智慧光
第三佛名利益心	第四如來帝吉祥
第五如來名天智	第六佛號尊慧王
第七佛名智吉祥	第八佛號光照王
第九勇猛天行佛	第十法界蓮華尊
此十能顯廣大法	令我成就第三門
此後無間復值遇	次第相續十佛出
最初寶燄山吉祥	第二功德吉祥佛
第三佛號法光明	第四佛名蓮華藏
第五智月妙眼佛	第六如來香寶光
第七善逝須彌德	八名乾闥婆光明
第九摩尼藏王佛	第十具足威德佛
此後次第有十佛	相續出興於世間

- | | |
|---------|---------|
| 最初佛號廣大智 | 第二佛號寶光明 |
| 第三如來功德雲 | 第四佛名最勝相 |
| 第五苦行圓滿光 | 第六佛號那羅延 |
| 第七世尊須彌德 | 第八功德輪園王 |
| 第九如來無勝幢 | 第十佛名大樹王 |
| 此後次第有十佛 | 相續出興於世間 |
| 初名帝德娑羅王 | 二名普現世主身 |
| 第三佛號高顯光 | 第四佛名金剛光 |
| 第五世尊地威德 | 第六甚深法德王 |
| 第七法海大智音 | 第八佛號須彌幢 |
| 第九如來智光煥 | 第十妙寶吉祥王 |
| 此後次第有十佛 | 相續出興於世間 |
| 初梵光二虛空音 | 第三法界像吉祥 |
| 第四圓滿光明輪 | 第五諸方智光幢 |
| 六虛空燈七妙德 | 第八徧照吉祥光 |
| 第九福光寂靜德 | 第十大悲雲吉祥 |
| 此後次第有十佛 | 相續出興於世間 |
| 初真諦力智光明 | 二現一切衆生前 |
| 第三名爲高顯光 | 第四佛號光明身 |
| 第五善逝法出生 | 第六名爲速疾風 |

第七世尊吉祥相

第八如來勇猛幢

第九佛名寶肢節

第十普現三世光

此後次第有十佛

相續出興於世間

初佛願海吉祥燈

二佛吉祥金剛山

第三堅固須彌德

第四佛名念幢王

第五如來法智尊

第六佛名般若燈

第七佛號德光幢

第八佛名廣大智

第九智行法界門

第十法海智吉祥

此後次第十四佛

相續出興於世間

最初福山功德王

次佛名爲智吉祥

第三如來法駕輪

第四寶王吉祥佛

第五功德輪吉祥

第六普智燄光佛

第七佛號須彌燈

第八世尊迅疾光

第九如來大寂聲

第十佛名寂靜幢

十一衆生吉祥燈

十二大願速吉祥

十三無能勝力幢

十四世尊智燄海

皆於世間爲上首

普利一切諸衆生

此後次第有十佛

相續出興於世間

第一佛名法自在

第二無著智如來

第三世尊海慧音

第四衆密音調御

五名具足言辭佛

第六妙音大吉祥

第七佛智自在轉

第八普現衆生前

九等衆生吉祥身

十名德賢自性山

如是須彌塵數劫

所有上首諸如來

普爲衆生作世燈

我皆供養無空過

復過佛刹極微數

劫中所有諸如來

我於一切咸供養

入此甚深解脫海

我於如是無邊劫

修行得此解脫門

汝今聞已速修行

不久亦當如我得

善男子我唯知此菩薩普現一切世間調伏衆生解

脫門如諸菩薩摩訶薩集無邊行海發種種解心現
種種身具種種根滿種種願入種種三昧起種種神
通成就種種方便能作種種利益遊入種種智藏照
種種法門海得種種法光明往種種佛刹海受種種
佛灌頂事種種善知識悟種種解脫門證種種自在
心起種種無作行現種種難思色順種種衆生心起
種種變化身入種種菩薩地知種種法因緣離種種
妄分別依種種菩薩願持種種佛遺教安住出生普
賢妙行而我云何能知能說彼功德行善男子去此
不遠菩提場中有主夜神名具足功德寂靜音海坐

星宿光幢摩尼王莊嚴寶蓮華藏師子之座百萬阿
僧祇夜神以爲眷屬前後圍遶汝詣彼問菩薩云何
學菩薩行修菩薩道時善財童子頂禮其足繞無數
市殷勤瞻仰一心戀慕辭退而去

大方廣佛華嚴經卷第二十

校讎

第二紙

十七行二
比藏作一

金匱于同庚 王秉鉞戊午七月初八日丑時生堂曹氏壬戌九月十九日未時生福保
夫妻偕老共地贊刻此
華嚴經普賢行願品第二十卷 汝寧丘丘如清對
萬曆辛卯夏滿涼山妙德庵識
進賢洪謙刻

四